

782.17
8324
:25



Inches
1
2
3
4
5
6
7
8
9
10
11
12
13
14
15
16
17
18
19
8

Centimetres
1
2
3
4
5
6
7
8
9
10
11
12
13
14
15
16
17
18
19

TIFFEN Color Control Patches
© The Tiffen Company, 2007

碑傳集卷六十七目錄

康熙朝督撫下之上

廣東巡撫彭鵬傳 廣東通志

又彭無山遺事 杭世駿

光祿大夫刑部右侍郎前總督湖廣等處地方軍務兼理糧餉兵部右

侍郎兼都察院右副都御史蒲陽李公輝祖神道碑銘 王士禛

王繼文傳 八旗通志

大中丞張公泰交傳 靳讓

又巡撫浙江兵部右侍郎兼都察院右副都御史公孚張君墓誌銘 陳

節錄 都察院右副都御史河南巡撫李公國亮墓誌銘 嚴虞惇

光祿大夫總督浙江福建等處地方軍務兼理糧餉兵部尚書都察院


右副都御史劉公兆麒墓誌銘 張玉書

原任安徽巡撫都察院右副都御史高公承爵墓誌銘 嚴虞惇

光祿大夫太子少師吏部尚書宋公犖墓誌銘 湯右曾

又宋漫堂傳 顧棟高

又宋漫堂傳 顧棟高



碑傳集卷六十七

康熙朝督撫下之上


廣東巡撫彭鵬傳

廣東通志

嘉慶二十一年吉纂錄



彭鵬字古儒莆田人舉孝廉官垣中直聲震天下康熙四十年出撫粵西政務肅舉旋調粵東屬吏聞其至惴惴屏息鵬進諸司而訓之曰周官六計上廉吏不廉則雖有小善不足錄也故墨吏即劾無少徇者性勤敏視事常至日昃退則緝閱官書讞語目不停覽手不停披夜漏三下未寢率以為常有以獄上者鵬輒親讞發奸如神掾吏伍伯不敢索一錢會天旱史巫祈禱弗應鵬露頂跣足行赤日中汗出如注從者以巾拭之不許甘霖大沛粵人為喜雨詩紀其事時仲坑開採聚眾幾二十萬鵬驅散之惠潮陰受其福鵬博學強識條貫經史熟於國家典故凡有奏疏犁然當利病常愛惜人材汲引公當經薦劾者朝廷俱不次擢用未幾以勤勞卒于任崇祀名宦彭鵬字奮斯莆田人康熙三十九年巡撫廣西志先聲所至貪墨股栗下車後省刑布德減稅輕徭粵西舊有魚膠鐵葉之供非本省所產每歲赴粵東購運鵬



疏請免之

志一統

又彭無山遺事

杭世駿

彭鵬字奮斯號九峯福建莆田人九世祖漳江遷錢唐曾祖從野公文質復徙興化郡城之刺桐巷家世甲科清白相嬪從野公厯官廣西左參政贈兵部左侍郎祖憲安廣東陽山令父汝柏處士鵬六歲授書處士晨夕抱置膝上方春晝與以天時將作雨五字屬對卽應聲曰地氣欲爲雷聞者咋舌九歲操觚十歲山寇竊發圍郡城大掠劫人要贖賊蔡某與處士有隙發卒圍其家處士他出得免又以孺子早慧必欲殺之復來圍室鵬登屋急走逃於族叔祖母牀下二日得免母戴孝子文學應禧女也告處士曰食盡矣稍延俱隕屢告輒呵阻一日處士宿從兄家母乘閒黎明率鵬兄弟偕伯母伯兄潛出南關將奔錢唐祖居行未數里遇長髮二十餘人裹頭持械恫喝而上眾皆戰慄伏地有蟻姓者長矛衣甲後至呼曰老者家姑餘吾中表也乃釋之送至渠頭橋橋斷獨木爲梁鵬怖不前蟻姓負而渡旣渡乃言曰過此可無慮伯兄年二十餘剃頭短髮母泣懇護伯兄至家蟻毅然無難色挈伯兄先眾緩步更闌迷失道蟻與伯兄返尋遇夜巡伯兄以短髮被執蟻亦受縛達

旦始釋而彭氏家世姓名蟻初不知也蟻以救鵬母子兄弟寇遷怒逐之旋爲營丁所戕後鵬哭以文所謂吾母子兄弟伯母伯兄之命君生之而君之命吾母子兄弟伯母伯兄死之也而究不知其名也處士入自外室虛無人閒道走南箕遇寇拘執文學吳某走賊壘請而脫之逃至吉蓼城陷從吉蓼潛至舍鵬與母亦稍稍聚寇跡知復來圍室無所之仍走吉蓼鵬從而後十歲兒徒跣八九十里備嘗艱苦其時麥五兩一石處士自磨麩作糜漿寢席濕鹵地夜不能寐爲人畫一袍購麥一斤八兩父子止一餐寇退始返躬自割麥日烈鵬持大葵扇隨母掃落葉代薪鵬負筐隨乳母俞誇於眾謂鵬爲非常兒爲人礮米線囊貯果餌遠來啗兒赴童子試入城城中戚串見彭氏貧無有舍鵬者俞嘗在沈家棲止攜鵬宿於沈鵬年十二弱小不勝衣遇試日五鼓俞襁至試場前門闔始去日午必竚俟襁而歸年二十試於學使者冠一軍順治庚子舉於鄉出永嘉王錫瑄之門有國士之目錫瑄時方李福清也康熙十三年靖南王耿逆以全閩叛幽總督范忠貞公承謨於請室囊鞬從公入者城守營千總廖有功也以大義責逆力竭而死同日死者福州府知府王之儀建甯府同知喻三畏侯官縣知縣劉嘉猷繼此嬰城

死於福甯鎮者總兵吳萬福也闔門死於漳州者巡海道陳啟泰也繫
組死於不赴召者龍溪縣知縣李埏也范公以下七忠鵬嘗爲文祭之
後皆爲之立傳聞中搢紳及舉人進士未銓授者逆檄偽州縣敦迫就
道聞士恥爲之用進士葉有挺走山中經於古木朱翰春焚右股毒藥
攻潰肉腐殆見骨舉人游標伴瘋劉渭龍麻衣徒跣以丁母艱免皆鵬
密友也鵬猖狂臥病日啜綠豆一杯去渣存汁絕粒飲水鬱爲枯腊偽
曹院偽樞密偽都督爲布政節次檄催偽府縣偽同知偽縣丞親臨相
視三年中死去二十五度或盡兩日夜灌以藥不甦災以火不甦穿鑿
牙關滴以湯水不甦魂歸白石山遇神僧稱本師其侍者郝頭陀稱渡
和尚號以無山無山本師所命也處士遂削髮爲僧裝鵬臥牀千日逆
平蹶然而起計凡五上春官入試者三不得已謁選人得三河令三河
爲畿東劇邑旗民雜處驛路衝疲鵬至革火耗革陋規嚴保甲減驛累
平冤獄建黌宮設義學禁拷索車夫之旗人詰冒充黃帶子之游棍實
心任事不畏強禦

御前放鷹者至縣使來索餼牽鵬於庭鞭之齧鹽自矢有時絕糧然歷
任一十四年降級者十有二議調者十議削者二

聖明洞矚皆邀恩免巡撫于成龍特薦
召對時問及家世并拒僞狀賜金嘉獎命吏部郎赫申兩日馳七百里
口傳

上諭詢撫臣彭鵬爲人何如居官何如居官好處是如何好九卿列薦
十一人大司馬李天馥啟奏鵬名

上曰朕召見久知之於十二人中特簡四人鵬第一邵嗣堯陸隴其趙
蒼壁皆御史鵬特以給事中用需次回籍卽家補授工科給事中時歲
在甲戌會試充書三房同考得士九人相國高文良公其倬其一也旋
以原銜河工效力國帑絲毫勿預幫築大墩草壩等處挑濬帥家莊淤
淺運行無誤秋濤齧隄止宿其上誓身同去留以病乞歸不得請時
上親征準噶爾奉有爲國家公事捐馬卽與爾等本身出征效力相同
之旨捐馬二匹請以馬代身乞假暫歸旋以原官起用劾奏元輔直聲
震天下出爲貴州按察使有

詔過家上冢主僕行李裁二肩遷廣西布政使歷廣東巡撫
舊史曰錢唐馮景素仰重鵬聞諸客言鵬黃面白鬚而齒盡禿遂附會
其事云甲寅閩變賊欲污公公罵之賊怒擊齒盡落夫鵬居興化郡城

逆據福州不相見也逆檄鵬鵬堅臥不起拒偽三狀見刻古愚心言中辭甚婉款而致偽參軍偽治中偽郡守書皆以病未嘗一言抗也鵬示疾牀頭置錐穎客至省疾覲面藏指縫暗刺牙齦隨手見血含津液佯示血咯凡十餘日齒血涸竭牙齦崩露其事詳上其房師永嘉王錫瑄書中齒禿之故以此此確證也景又言鵬為給事中劾奏癸酉順天主考不公至請斧劈臣頭縣太學以謝士天下壯之按古愚心言訖於康熙丙子此言果實又在丙子前三年何以不刻入心言中然以其目考之凡二十八類獨無奏疏意其奏疏未刻而景所見者邸抄有無不敢決也

謹案原編有保甲示一首已見經世文編今不錄

光祿大夫刑部右侍郎前總督湖廣等處地方軍務兼理糧餉兵部右

侍郎兼都察院右副都御史蒲陽李公輝祖神道碑銘 王士禛

鐵嶺李氏自甯遠伯成樑以閩閱顯勝國時勳庸世及貂蟬相映至本朝其門益大入參帷幄出為將帥代生偉人虎步龍攄風雲際會非偶然者也李之先出於朝鮮其徙襄平自英始英以軍功授鐵嶺衛都指揮使有子文彬文彬子五人長曰春美春美子涇是生甯遠自文彬

至涇皆贈特進光祿大夫太傅兼太子太師次曰春茂春茂子潤潤子成功成功子三人長曰如樾知太原府子思忠自成功至思忠皆贈光祿大夫太子太保總督湖廣兵部尚書三曰如梓如梓子恆忠歷階資政大夫官副都統世襲一等阿達哈哈番資政子三人而光祿公最長諱輝祖字元美別字蒲陽幼凝重和厚不苟言笑事父母特以孝聞起家佐領以才望推擇為兵部員外郎康熙十二年滇逆變作逆孽吳應熊居京師潛結羽黨謀以歲除發難事覺多所連染有姚彥際者誣引平民三十七家必廉其冤盡釋之遷郎中出督淮安三關會軍與旁午商旅不通關推多缺公潔身釐弊商至如歸比歲滿額外贏金二萬有奇悉以歸之縣官十八年擢貴州按察使黔疆初復藩伯暨道府咸缺公一人攝四篆會大將軍貝子進討雲南駐兵貴陽糧糗芟芻皆取辦于公咄嗟立應無後時者巡撫楊中丞雍建倚之如左右手又請于大將軍嚴禁軍中樵采無得出五里外又請以道院佛刹居兵無侵民舍于是大軍數萬駐黔而市不改肆羣歌舞之尋擢湖北布政使以內艱歸久之起補四川布政使蜀賦額舊九十餘萬明末獻賊蹂躪之餘僅盈四萬而仰鄰省協濟至六十萬公敷政寬簡屏除煩苛通商惠工哀

鴻漸集蜀諸郡有霸荒霸熟之弊公廉知之將釐正以均徭賦願欲速則民將弗堪行之以漸則民不驚而事易集乃下令民得自首餘田一切勿問七年之間復賦額二萬六千餘兩而民若不知某中丞繼之欲邀功利驟增且四五倍而民始病矣公力爭不可當事者銜之劾公阻撓公屹然弗爲動蜀民以是益德公如畏壘蜀亂後劍門路塞豺虎宅焉行旅取道閬梓諸州公請開葭萌驛路以通商便郵減閬中路三百餘里歲省驛遞金錢無算署巡撫事疏免額解白蠟若干又興庠序旌節孝政聲藹然流聞京師內擢太常寺卿進大理寺卿都察院右副都御史巡撫河南上器重之屢有持重練達之褒未幾特簡都察院右副都御史巡撫河南陞辭詢家世甚悉公感激知遇思所以報稱副上意者謂續民膏在除雜派肅吏治在重監司而表正影直尤在潔己率下力絕苞苴于是糾彈藩臬大吏無所鯁避一時羣僚肅然豫漕歲數十萬石以衛河有巨石不利漕艘遂采辦于大名之小灘軍民苦之公驗河道巨石所經才一二里里不逾三四丈未廢行舟疏請復衛輝免運舊例得旨允行三十五年

車駕三征漢北公親部車徒至京師軍精大集而民不擾會平陽蒲阪閒有亂民之警隔河相望而豫境晏然人益以是多公之得民也先是公從兄廕祖以大司馬總督湖南北楚人懷其恩威且三十載至是復擢公少司馬兼憲職以往特賜彤弓旅矢副以甲冑公仰荷國恩俯念家世至卽肅綱紀飭吏治詢疾苦核將領蒐軍實楚多私鑄蠹錢法者特嚴其禁令以絕根株又疏請均湖南賦以爲舊之文田率派丈非清丈也請立簡要之法使州縣人自爲文具實于官而官抽覆之有不實者論如甲令報可會有掣之肘者公志迄不得行茶陵人陳丹書倡亂流劫安仁公策其必犯衡州亟飛檄提鎮夾勦而發標兵馳赴果敗賊衡州城下逆渠以次就禽會以刑部侍郎內召而公已病矣公之自楚藩歸也或言淮三關應增稅額者上召問公可否狀公對曰關稅贏絀視商旅之多寡多寡無恆而取贏焉商旅必困上是之稅額得仍其舊公持議寬平類如此也公事繼母減盡孝愛異

母弟儀祖與母弟方伯興祖無異以世職讓之內行醇備三郇無閒言
生崇德六年六月二十六日卒康熙四十一年三月十七日得年六十
有二子三人錕正黃旗佐領鉉池州府同知候補僉事鐔筆帖式孫六
人某某錕等以四十二年二月二十一日大葬公于完縣西北望都坡
山陽祖塋之昭來請銘神道之碑銘曰
仙李盤根隴西贊皇爰及銀州柯條益昌戕戕甯遠功書太常山河帶
礪與之久長奕葉蟬貂遐哉未央
眞人應圖虎變龍驤攀鱗附翼耿鄧頡頏維大司馬建節楚疆維公繼
之節鉞相望北綏雲夢南奠衡湘漢有二馮立洎野王政如魯衛歌誦
洋洋公家二難于漢有光蒲山巖巖蒲水湯湯鬱鬱佳城名臣之藏

王繼文傳 八旗通志

王繼文字在茲漢軍鑲黃旗人順治八年

特詔禮部考選八旗通漢文者任內三院官繼文由官學生應試入選
授宏文院編修十年升兵部督捕副理事官十二年以才能保舉
特授巡按陝西監察御史十四年差滿回京都察院考核稱其實心任
事善政最多以稱職具題照例升轉十五年升戶部固山司正理事官

十八年外補江西按察司副使分巡饒南九兵備道時值

欽差部員至饒州南康九江鄱湖一帶清丈蘆洲使者頗作威福濫增
蘆稅又供應紛然民不堪堪雉經鼠竄所在多有繼文急爲撫綏諭以
無恐細心調劑凡屬童灘秋冬水涸始露而春夏仍淹不產蘆葦者概
免科賦日單騎走烈日中與使者丈量外泯異同而中爲補採民人感
悅康熙四年升浙江布政司參政分守甯台道六年裁缺回京候補十
二年冬逆藩吳三桂反于雲南王師分道南征繼文以簡選人材奉
旨往湖廣軍前協辦糧餉尋以官兵破叛鎮楊來嘉在事有功議敘十
四年雲貴總督鄂善于軍前題補雲南布政使仍贊理招撫糧餉等事
二十年三路官兵進取雲南定遠平寇大將軍貝子章泰以繼文軍需
無誤贊畫有功題補雲南巡撫繼文率兵追賊至晉甯昆陽海岸地方
獲米八千餘石十月親率標兵同勇略將軍趙良棟攻取玉皇閣新橋
土橋東寺西寺等處奪三市街得勝橋直逼雲南省城南門會同各路
官兵攻城二十日逆孽吳世璠自盡逆黨以城降繼文入巡撫衙門視
事雲南自逆藩變亂苛政以應糧餉民不聊生者八年于茲流亡載道
瘡痍滿野繼文會同督臣撫綏安集並見蔡毓榮傳又特疏請修河壩

爲生聚根本言雲南省城外東南舊有金汁等河從松華壩借水于盤
龍江自嵩明州流入昆明境遠城之北過雲津土橋趨入昆明池兩岸
築隄高二三丈不等而水流其中蜿蜒六十餘里有壩有閘又有過水
涵洞蓋以積水灌田凡城外數十萬頃皆藉此河之利民生國賦均有
攸賴焉自變亂之後沿河隄堰壩開未經修葺日久傾圮上年大兵圍
困逆孽周圍壕塹不得不拆毀挑挖以致水利阻塞灌溉不通田畝荒
蕪居民失業昆明額賦莫可催徵自克城至今臣多方招徠而流離之
眾見此附郭膏腴成棄土未免趨趨不返哀此殘黎欲歸則無資生
之策不歸則有溝壑之虞臣不得不早爲之計也夫以滇省軍餉取給
外省頻經請撥仰屋
宸衷而昆邑應徵之賦可耕之田豈可坐視拋荒聽其虧額臣檄令地
方官踏勘估計需用椿木開枋灰石各項材料並匠作人夫等項約需
銀萬餘兩查全書內開載歲修松華等壩額銀八百兩每年十一月中
起工至次年三月初止往例可稽似當亟議興修以復民業然動支原
額銀兩萬不敷用值今財用艱難工程浩費何敢于額外輕動正項錢
糧請于通省官員及各屬土司酌行捐助新定之區人力拮据非有以

鼓勸之恐難必其樂輸伏查捐納各例業奉停止臣不敢復爲陳請惟
是紀錄一款旣無礙于名器又可鼓其急公合無仰
聖恩敕部酌議捐銀若干准與紀錄仍比照各省往例量減額數庶眾
擊易舉便于興修至工竣之日臣造冊送部照例敘錄則河壩固而水
利可通俾四散之民咸圖歸計漸次開墾將見生聚寢昌而昆邑糧賦
可以望其復舊矣事下部議如所請於是地關民聚漸有起色二十五
年以母憂去官二十八年服闋適雲南巡撫石琳升任員缺奉
聖祖仁皇帝特簡再任繼文星馳赴滇欲舉向所未及行者悉力講求
時諸廢頗已修舉吳逆苛政亦釐剔殆盡惟黑鹽井加課銀兩已經豁
減部臣復行令徵收民情惶惑繼文卽繕疏入告言黑鹽井月增課銀
二千兩歲增銀二萬四千兩向緣吳逆自秦入滇官兵家口不下數十
萬食鹽眾多行銷稍易因而題請加增原非行鹽舊額迨全滇恢復之
後民多流散戶口寥寥課額虧次難徵於康熙二十一年經臣會疏具
題已將月增課銀二千兩遵奉
俞旨減除今于奏銷康熙二十七年鹽井課稅案內准到部文仍將此
項銀兩令自二十九年照舊徵收查滇省自平定以來仰荷

聖恩遐播商民安享太平固已有年但逆屬家口盡行起發投誠人員已經安插各省現今戶口所增無幾食鹽甚少行銷實難現在月額銷鹽四十七萬斤徵課七千八百餘兩尚苦積年鹽壅課逋商受催比官雇參處歲不能免曾經前任撫臣石琳才全書案內將課重價貴情由請照琅井課則議減在案今若將此項課銀照舊增收則增課勢必增鹽鹽愈壅而有司無地疏銷即不增鹽必增鹽價價愈貴而窮民益難買食商民滋累較深各官徒受參處國課仍然虧欠究無裨益是現在之額端望議減而已豁之銀萬難加增茲據司道府州縣詳具商竈軍民紛紛籲訴前來所當仰體朝廷愛養商民至意據實入告伏乞
敕部查議將此項銀兩照前豁免則井竈商民均沐
聖恩永永無極矣又以雲南屯糧額重軍逃籌請屯荒減則貼墾疏言滇省每年額糧通共米麥等項二十六萬餘石而屯糧實居其半累年共撥兵精關係甚鉅屯田一畝之科幾納民田十倍之徵是以拖欠逃荒年甚一年臣自再莅茲土以來訪求民隱圖布
聖澤惟此屯田一項最為滇民苦累近蒙

朝廷沛無疆之德將康熙二十一年起至二十七年止屯賦參欠錢糧盡行蠲免一時老幼咸懷再生從前重困已得暫釋額賦豈容再寬而輸將實無遺力臣再四籌畫惟有老荒重額田地一項小民終年畏棄已成廢土若使減則貼墾尚可藉補虧懸行據布政使于三賢署糧儲道事永昌道參議畢忠吉議將前項老荒地凡係連年見納軍糧之人承墾者將屯田地上中二則六年後悉改為民田地之下則起科屯田地下則十年後改為民田地之下則起科以補賠累之苦其不係見納軍糧之人承墾者六年後將屯田地上中下則悉改為民田地之上中下則起科仍令地方官量借牛種及出陳米石務使力耕有成至于民間荒廢田地其上中二則做照豫省六年後係中則者照下則納過三年再歸中則係上則者照下則納過五年再照上則之例起科其下則田地請于六年後減半又三年再照本則起科並承墾後即為己業用備貼墾事宜臣伏見
聖恩有加無已凡重農廣粟之例莫不一舉行必使四海無不獲之夫九宇有蓋藏之富今滇省田地本屬磽薄屯民尤困追呼若以拋荒不墾之田補其重額難支之累及民荒田地一概極力勸墾不但正額

可以充實新賦亦可稍增矣疏入並得請軍民稱慶焉三十三年九月
升雲南貴州總督督臣專理軍務而雲貴邊地籌餉為艱貴州田少餉
尤難備繼文疏請再

賜豫撥并准季首掛餉俾得按時接濟者黔省山高土瘠夷多漢少比
他省為最苦各營兵丁晝夜防禦保固地方專盼月餉按時散給庶堪
餬口因撥解餉銀到黔惟春季豫撥銀十萬兩可以季首關支夏季之
餉他省于四月完半之後始解遲至六月中方到迨布政司移令委員赴省
于九月全完之後始解遲至十二月中方到迨布政司移令委員赴省
領支未免又需時日各兵俱屬赤貧且一兵名下尙有家口既無可耕
之田又無可營之業望餉不到枵腹難支勢不得不重利揭債及至餉
銀領到盡還他人禁之則兵無所藉不禁則法實難貸欲遏其流必清
其源此豫撥夏季兵餉之請撫臣閔興邦所以兩疏入告而臣受事之
後亦經題請部議俱未覆准臣深悉情形又不敢即為緘默上負
朝廷愛卹士卒之至意也即如上年地丁錢糧叨蒙
聖恩蠲免秋收尙未成災而黔地產米有限一時米價騰貴兵丁便稱
艱食臣嚴禁遏糴查拏積囤並示有米之家乘時發糶兼飭兵丁不許

邀商攔買米價方漸平復兵丁不致困苦總緣黔省在深山舟車所不
能到設餉銀愆期各兵若不重利求借則債主難覓較諸他省民間有
無尙可相通者實屬懸殊在部議因他省協餉係本年地丁銀內解送
而四川雲南亦止豫撥一季故未議准耳第撥給協餉原屬大省在彼
省藩庫有銀可動而貴州省分尤小又與四川雲南不同臣節制兩省
不將雲南夏季兵餉豫期撥而獨將貴州夏季兵餉再疏題請實有
見于貴州兵丁更苦不敢不為籲陳也相應仰體
聖恩恭疏題請如蒙將貴州餉銀添撥十萬兩預于頭年冬月解黔湊
發春夏二季之餉俟他省四月完半餉銀解黔湊放秋冬二季之餉四
季皆得照依秦省之例季首關支則國帑無所損軍需實有所裨士卒
頂頌無極邊方不無小補矣又貴州普安等處原食川鹽其後改食滇
鹽課重稅繁民苗困苦歷年課額並未徵解前任督臣范承勳題請減
免部議不准奉

旨這事情著將舊欠銀一萬九千餘兩免令賠補其普安等處應作何
行鹽四川雲南貴州總督巡撫會同議奏繼文疏言普安等處崇山峻
嶺夷民散處窮苦鹽引難于派銷滇鹽每百斤課一兩六錢稅銀六分

二釐五毫曲靖府稅銀一釐四毫新銀九錢腳價銀一兩七錢八分即
使賣銀四兩三錢尙屬不敷再加黔稅銀三錢更無從出滇商苦于遠
運黔民苦于價貴又川鹽不拘斤數零星可買滇鹽必須整塊川鹽不
拘米布皆可易換滇鹽必須紋銀川鹽價賤每斤不及三分滇鹽價重
溢于四分三釐之外以黑井最貴之鹽行于普安等處最窮之地不特
苗民告苦即商竈亦不免賠累相應稟導
聖旨議將普安等處改食川鹽川省照依課例歲增課銀二百四十五
兩一錢零黔省照依部頒全書所載歲增稅銀八十四兩零遇閏加增
銀七兩二分零滇省無鹽課稅照數豁免並得
旨允行三十五年魯魁山賊首擦捏等劫掠夷村伏弩暗傷新嶠營守
備張廷柱繼文會同臨元總兵官王洪仁遣發流土官兵勦撫斬賊首
擦捏于磋都溝事訖上聞并言魯魁山山林小賊在事人員無庸議敘
得
旨魯魁山賊眾盤踞總督范承勳巡撫石文晟俱會明晰面奏官兵勦
殺擦捏等賊可嘉在事有功人員俱著議敘以示鼓勵三十七年八月
疏言魯魁山賊首擦捏雖滅餘黨猶存新嶠一營孤懸賊窟請設汛增

兵巡防要害查江內慢于壩乃新平縣治適中之地應撥千總一員駐
防江外舊哈跨東大口三家坡等處請增設四汛增兵三百五十名臨
元鎮原設楊武壩一汛就近歸入新嶠營添設參將一員原設守備改
作中軍守備又野賊非入新元即奔楚景楚姚一鎮最爲緊要查援勦
兩協乃策應之師各撥千總一員各帶兵二百名一駐南安州界牌一
駐景東府福都責令防守部覆如所請施行是年入京陛見以年老乞
休

聖祖許令原官致仕三十九年奉
命督修直隸子牙河功成特恩加兵部尚書銜四十二年卒于家

賜祭葬如典禮雲貴軍民共請崇祀名宦祠又江西南康九江士民以
繼文秉公清丈蘆洲實有功德亦公請崇祀名宦長子用霖由廕生筮
仕累遷至河東副使道康熙四十九年陞廣西按察使廉靜不擾能以
禮讓教其俗尤加禮士子政簡刑清獄無冤濫尋升任山東布政使既
卒廣西士民德之公請崇祀名宦祠
大中丞張公泰交傳新讓

張公諱泰交字公孚一字洎谷晉澤州之陽城人居於縣東北鄉屯城

村其先世多賢達近代傳聞尤顯有所謂太宰公諱慎言者明萬曆庚戌進士累官至南太宰乃公之族祖父也高祖昇初登嘉靖庚戌進士歷官河南布政司參政後以孫太宰公貴贈光祿大夫太子太保吏部尚書清白無貲產貽子孫曾祖天與增廣生祖慎思貢生父履祥庠生皆手一編家固貧公生有異徵羣驚非常兒八歲受學於從兄讀三字經至揚名聲顯父母句慨然有志授以千字文不屑讀學舉子業文即成章然筆楮書籍貧無以具也稍長貧益甚晝則操作維勤夜讀無燈燃柴照之幾欲廢學服賈適從兄下第歸鍵戶攻苦攜公與俱公處破壁食藜藿晨昏誦習不少懈每當霜天雪夜星月交輝未嘗不仰天唏噓感慨奮激也余郡張平倩先生令於陽城閱公文以國士許之公由是益決意於學次年補博士弟子員平倩先生授以春秋經義康熙辛酉即以春秋舉於鄉壬戌登進士第澤州陳相國時以翰林掌院學士副總裁得公爲門下士頗自喜公爲文疏暢坦夷氣沛而詞達見者無不歎賞以故名動一時公竊念人當貧賤時或驕人及登一第輒預他事通刺郡邑關說希求頓喪生平者往往而是用是益自勵嗟乎公蓋能處以約者因授舉子業於高平張某讀唐宋八家文涉獵羣書日求

其所未至者及有關政事諸編無不記覽初選滇之太和令太和爲大理附郭凋殘疲敝民不堪命舊令註誤者纍纍也至公爲之多所設施盡革眾弊以紓民不以上官喜怒爲向背勸學興利治行獨最詳載譜誌中公去時老幼男婦塞道號泣有詩云五年心血枯將盡百里瘡痍起未全是豈不關民瘼者語耶可以知公之爲政矣其由太和而召爲御史也獻替諸大政奏對詳明巡視北城發奸摘伏更赫赫有能聲戊寅山左饑人相食泰安州尤甚巡撫李某將泰安等州縣積貯之米變價移補他州縣公上疏請賑并劾撫臣

上遣官往賑饑民二十八萬有奇革撫臣李某職用公之言也初公謁選京師寓天甯寺同邑衛慎之與公爲文字忘年交一日過訪屬對云身有餘閒心無俗累覺生平受用惟斯現在公曰民是吾胞物是吾與看眼底痲難緩須臾噫公之志蚤見乎斯語矣

欽差巡視長蘆鹽政鹽政故多陋規而商人豪猾者習以賂賄鑽營饗燕贈送之資甚厚以故居是官者往往見利而動恣封殖以自私商課且至困絀焉公獨申明條約其已甚者革之其無礙者仍之課以辦而商以蘇故雖贏餘頗足以自潤而公猶能持廉名以自全也內陞太僕

寺少卿未幾

命提督江南學政公於是本平日之所學者以勸戒多士課試之文險怪提穿空疏糾纏者皆抑不與文風以變一切幕費取諸家囊凡所為情賄弊竇者絕之必嚴其豈弟作人者固甚寬也公大要以慈恕簡靜為體

上亦以此知公特陞大理寺卿已而陞副都御史又陞刑部右侍郎上蓋急欲以巡撫用公故三遷其銜而不遷其任迨試差報滿而巡撫

浙江之命下矣癸未上閱河工幸浙公蒙賜賚甚渥由是愈感激益相率以廉靜其於杜奔競清吏治察水旱勸農桑宣教化慎刑獄以及海汎關津禁暴懲貪抑豪靖盜諸務所以經營拊循緩急輕重之際無不盡瘁以圖使吏不得以為姦而民不苦其擾也其留標兵築江塘則又未雨綢繆之計所以備豫者遠矣公在浙一無所染歲費悉取之家如督學江南時其自敘譜云妾不衣帛廩無一馬蓋實錄也乙酉上復幸浙召對温文錫予稠疊眷公者甚隆是時公病已漸作監文武兩闈皆力疾視事事竣病愈甚然猶扶病錄囚親鞫審定病隨大作維

公亦自知其不起也急疏請歸田

上差內閣中書噶爾泰問疾比其反疏未下而公病革享年五十有六既薨遺疏上聞

上命有司給銀五百兩供葬事並賜祭銀若干所以哀卹之者厚矣公為人寬和廉慎不為崖異之行及至有所特立固有人不能及者其蚤年居貧奉母撫弟勞身苦志無倦色喪母時一慟幾絕以致兩目努肉攻睛亦其天性然也嘗館於陽阿書舍竈底得遺金公持以還主人館高平時有富家子禁於獄縣令欲得公一名刺釋放令謝公四十金公拒之人服其守此二事亦足以規公矣公自樹宏達不肯碌碌故其為政所致民多立祠自會祖以下皆用公貴贈光祿大夫如公官曾祖妣已下俱贈一品夫人妻潘氏石氏喬氏亦俱贈封一品夫人繼潘者有暢氏例未得贈公數舉子不育以從兄秦來之子汝欽為後娶配詳行狀中公病亟時追敘生平自為年譜并其歷官撰著統為一集凡十二卷即以

御書受祜堂名之鏡板藏於家澤州陳相國既為銘以納於隧侍御田克五又為文以表於墓而汝欽復求余郡張平倩先生為公作傳以永

其傳是數君子皆深知公其言信可徵也尉氏靳讓曰余昔未仕時至陽城登侍郎田夫子之堂嘗與公一晤見其循循雅飭儼然儒者及歷官由粵西督學調三浙竊幸得悉公之治行而常炙其風度也迨乙酉歲迎送聖駕則又與公接舟邸共晨昏飲食起居者凡四十餘日公之性情亦頗覩焉見其日侍宸幄不通津要不交近侍不以容悅事主余實心折之彼夫夤緣以希寵狐媚以固位者其視公爲何如哉往余問公疾望其形神癯憊不禁泣數行下也人固有居一官效一職介然自守操同冰潔卽稍躋通顯猶勉強守之甚者處腴而矯能不潤焉以此得廉名亦似真能廉者一且致高爵厚祿撫有封疆之責多積然自喪其所守前所爲廉者祇以爲富貴之階耳若公之潔已率屬不改其操此余得之耳目之際者蓋公處貧賤而不苟故履富貴而能廉不激不隨可不謂君子人與公攻苦爲文章思以功名自顯卒登開府顯親揚名繼太宰之休光後先輝映公亦可以無憾矣然以余所聞於公云幼時贈公出遊不歸徧蹤跡之迄不知所在言之若痛不欲生者公於此得無遺恨乎是則余與公

亦不可謂不相知者故列其事於篇而并紀余一時之所以知公者如此

又巡撫浙江兵部右侍郎兼都察院右副都御史公孚張君墓誌銘陳節錄

張君泰交字公孚山西陽城人明南京吏部尙書慎言從孫康熙壬戌進士恥干請授徒數年爲太和令太和大理附郭民苦供億多竄亡而悍卒以縣廷爲營房前令莫敢問僦屋以居公孚方視事營兵來校射公孚謂縣令臨民地非兵校射所語不孫鞭之諸營讐伏永昌道轄七府大理轄八州縣而太和獨困煩役提學道臨試及提督道府公廨修葺諸所需皆累太和民公孚曰民曷以堪耶請以府歸五州縣道署歸八州縣提學道歸十三學使使其費提督則自葺其廨莫有違者兵糧由府佐給公孚曰有司責也縣收府放徒煩轉運何如縣收縣放之爲便大吏躉其請里民苦徭役力除之雖上官皆出貲募不復輕役一夫營兵占民居男女雜沓爲擇地立屋使兵民異處歲編審了戶例有心紅千金公孚誓於城隍之神而革之行取授廣西道監察御史有疏通選法山左饑民諸疏賽黃彪李三者巨猾也以私怨殺人誣張乙所殺

獄成矣鞫得情乙釋焉巡視長蘆鹽政申條約革陋規遷太僕少卿督學江南絕交遊卻私函雖家書必使人察無他始取視焉而待士惟寬士皆稱之未一年遷大理寺卿數月遷左副都御史又遷刑部右侍郎皆在學政差未幾巡撫浙江濱海玉環東洛南鹿諸山盜依以出沒公孚編保甲謹斥埃盜遂絕修築江塘易土以石四十五年正月卒于官浙人肖像祠於孤山公孚居虎谷里傍沁水沁水一曰泊水故又字泊谷其去太和詩云點蒼石在無船載洱海風狂有岸登其流風可想見云

都察院右副都御史河南巡撫李公國亮墓誌銘 嚴虞惇

公姓李氏諱國亮字朗菴世爲奉天海州衛人考諱逢茂以從

龍入關累官至驃騎將軍都督僉事沅州總兵生子二人公其季也公

少好學折節讀書中康熙壬子科舉人選授陝西蒲城縣知縣土寇唐

文義橫行鄜延同華閒公單騎造其營諭降之奉

旨加軍功紀錄時漢中新復大將軍圖公薦公有文武材卽擢漢中府

知府公發倉賑飢招流亡實戶口儲芻芟修烏江堰溉田積穀歲大旱

公禱於神大雨時注民歌舞之陞西安督糧道時王師已克川南奉

旨運糧於敘州敘距秦三千餘里公請於制府曰千里餽糧士有飢色

秦民甫出湯火而復使遠餉恐重困且誤軍需盍選賢能官齎折色赴

軍前准時價給之則彼此交濟制府從之於是軍得宿飽民獲蘇息壬

戌陞四川按察司使旋丁內艱服除補江蘇按察司使不三月清理舊

案三百餘事獄無留者平反周之楨等冤獄雪數十人會

大駕南巡公料理前站自淮揚至蘇杭

行在水陸儲頓皆供備無缺

上深以爲能卽擢江蘇布政司使江蘇富甲天下公私那欠動計數十

萬胥吏因緣其閒多至乾沒公爬梳鉤貫盡剔諸弊舊例漕項及兵餉

俸工等皆解藩庫以次出納公悉令歸該管官司收給洗手奉職不名

一錢屬吏畏公法亦莫敢染指公精明敏應事立斷故能使豪強斂

手奸猾屏迹長老言數十年以來官茲士者莫能及會公以舊任事註

誤降級去之日百姓攀轅號泣立石建祠以紀公德旣入都謁

上於通州

上素知公賢顧問再三其年九月復用公爲河南布政司使先是秦地

饑

上命運楚漕以賑秦豫當孔道車牛任輦絡繹相繼至是復有協運楚漕之

旨公念豫民彫弊不堪重役乃親詣楚與督撫酌議令楚民運至浙川豫民運至龍駒寨各就近轉輸運速而費省民以不困河北旱蝗率僚屬往捕道暘無水公以鞭指其地令浚井水隨鋪所至湧出適有黑蜂食蝗俱盡民以為神名其井曰應瑞井丙子春

上親征噶爾丹河南主給馬騾車輛期會迫促公悉捐俸工治辦應時而具民間不知又出私財養新滿洲具驢騾馬以助軍

上嘉公忠勤特命以副都御史巡撫河南公益自奮發思報恩遇河南漕運舊例衛輝起兌明季以部臣監兌駐大名遂改大名之小灘道里

遠隔遞送煩苦公相度形勢疏丹河水以通運道仍請改歸衛輝民以為便榮澤城逼黃河水波衝決歲糜金錢築堤捍禦公請遷縣治於古

滎陽郡為新城城成不數日舊城壞老幼感泣曰微公吾屬皆葬魚腹矣河南土曠不治田之未墾者以頃數之得三十七萬餘公請令各省

官民之以罪而入於軍流者僉發豫省開墾數年之間賦稅日增民食益裕蓋公歷官所至無不以興利除弊為己任凡事之益於國與便於

民者毅然行之莫為持難而又廉以律已勤以率屬明而不刻嚴而不苛故雖當繁劇倥偬之地而事至立辦處之裕如其於吳於豫尤歷時最久政績最著而施德於民最深民之戴公者亦最久而不忘也庚辰秋以薦舉失人部議革職奉

旨原品致仕公感

聖恩寬大隨請自願於永定河效力其修築郭家務舊堤五十三里山東饑復請於沂州養飢民一萬五千餘口明年復送回飢民八千口有零皆殫心盡力勉從事公雖去位而惓惓不忘

君國憂公如家又如此公前後疊蒙

恩寵有御書鞍馬果毅緞幣之賜丙戌三月公既病矣命子某迎

駕於涿州

溫旨垂問公年齒及病狀公聞而伏枕叩首感激涕零知

上之始終眷顧不衰也公生於某年月日卒於某年月日年六十有六

會祖某祖某考都督公皆以公貴贈光祿大夫妣皆一品夫人妻董氏

封一品夫人夫人有婦德葛覃樛木螽斯采蘋之美兼而有之先公十

年卒年五十有四子男五人夫人出者三元彝壽昌縣知縣元龍元璉

候選府同知庶出者二元樽十七兒皆先卒今存者元龍也女八人孫一人公既卒之二年元龍將啟夫人之窆合葬於某原具狀來請銘銘

曰業業李公實邦之桀文武隨宜智勇具設盤錯不懼應機立決於秦於黔吳豫更迭刑平賦均軍戢民悅惟忠與勤終始一節

帝念勞臣寵綏不絕

恩霑三世年虧大耋龜筮告祥崇岡帶嶧休烈遠垂視此刻碣

光祿大夫總督浙江福建等處地方軍務兼理糧餉兵部尚書都察院

右副都御史劉公兆麒墓誌銘 張玉書

康熙四十七年夏六月前浙閩總制兵部尚書寶坻劉公年八十終於

里第越一月公長子湖廣巡撫右副都御史玉伯先生聞喪釋官歸庀

大事寢枕苦塊凡三閱月將以十一月之下旬奉公體魄藏于縣豐臺

之舊阡欲紀公立朝居家庭鄉黨諸大節於窆窆之石借其季弟灑淚

具書以來乞銘於余惟公鴻名偉績彪炳宇內甲寅以後當用兵之際

常以大帥持節駐海濱江浙晏然得安枕席者皆公之賜玉伯先生司

藩江左五載中兩遇

翠華南幸經紀秩然有條

天子稱之曰才其他緩征減耗惠政尤多是公之父子為福于桑梓者

至深且厚於茲麗牲之文其何敢辭按狀公諱兆麒字瑞圖曾祖信祖

國楨父世則皆以公貴階光祿大夫如公官曾祖妣李氏祖妣褚氏王

氏妣魯氏皆一品夫人先世江南徐州人自曾祖洛臺公始卜居寶坻

縣東之豐臺封光祿善徵公生二子公其季也公幼而端重寡言笑舉

止如成人讀書過目即成誦為文皆有理法年十四時遇

太宗文皇帝觀兵畿輔亟收人才見公異之令入官學讀書年十六隨

世祖章皇帝入關又七年

詔選漢軍滿漢文藝以范文肅公為考官公名列上卷遂授翰林院編

修公起布衣為侍從感激知遇勉勵職業

世祖屢幸內院見公年少敏練心喜之十年中歷進都察院啟心郎又

改宗人府隨進都察院左副都御史時公年未三十而丰采整暇每奏

對輒當

上指人知且暮將大用公矣順治十八年滇黔既平餘黨散入楚省安

輯需人遂擢公湖廣巡撫

今上卽位大兵雲集征勦命公料理軍需齎送芻糗公調度有方不數載而伏莽悉定蒙

特恩加授工部侍郎楚人新羅兵燹公撫定喫咻寬嚴交濟仁恩被于江漢越三十餘年而玉伯先生繼官此七遺民故老猶有擁馬首問公起居者可以知公德澤之入人深矣康熙七年擢四川總督任事未久以裁缺回京師而在蜀數月招徠流移緩輯凋瘵不遺餘力嗣後進秩兵部尚書加從一品仍以撫川民功也八年授浙江福建總督時海氛未靖兩省皆稱巖疆公條上防海機宜老謀碩畫鑿然洞中肯綮兩省賴之以安十二年入京陛見適當三逆叛命廷推將帥之臣

皇上特用文臣三人改銜以往公其一也初任直隸援勦提督僅一年三輔清晏改授江南崇明水師提督崇明密邇海氛地稱險要公請自擇偏裨預儲糧餉壯我之威伺寇之隙

上稱善再三悉俞所請由是坐鎮十年內地甯謐人不知兵二十三年俄羅斯犯順大兵深入征伐

命於大臣中擇賢能諳練之員以掌軍事遂以公爲黑龍江總管督兵三次克奏膚功至三十一年邊塞旣靖而公亦以年踰六十母老在堂

拜疏乞歸

優旨俞允自是徜徉林泉遂初樂志於功名之際可謂報

國保身兩得之矣乞休後六年以致政大臣監修北河工旣竣

聖心嘉悅仍復公總督兵部尚書從一品玉伯在吳中迎駕時屢頒賜

公尙方珍物兼問公年及提督海疆歲月幾何公之上膺

主眷久而彌篤真人臣之殊遇也以余考詩書所載若方叔召虎仲山

甫諸人皆入爲卿尹出爲牧伯無事則任旬宣有事則兼將帥未嘗不

歎文武成康之化蘊釀有本故其人才之盛至于如此今觀劉公一身

培養於諸生之中者

太宗皇帝也歷試於侍從執法之列者

世祖皇帝也用以經文緯武敷歷中外者

今上之識拔也而公之才無往不宜視昔方召山甫亦媲美無愧自公

歿而中朝故老零落殆盡求

太宗朝之舊人不可多得矣公孝友性成家門雍穆可爲當世法生平守不欺之學上自僚友下至故交皆終身如一利人濟物之事見無不爲不能盡書特書其大者嗚呼公道德事業備人世之極盛壽躋八十

而神明不衰身見子之爲大官繼前業餘亦游歷郎署待綰邑符且身
後踰兩月而長孫復舉京兆公存順沒甯無復餘憾而玉伯昆弟猶必
假余一言以傳信永久余益歎仁人孝子之心之不忍自已有如此也
公生於天聰三年己巳十月十九日子時終於康熙四十七年戊子六
月十二日午時享年八十歷官總督浙江福建等處地方軍務兼理糧
餉兵部尚書都察院右副都御史加從一品康熙九年五月覃恩進階
光祿大夫初娶陳氏繼配鈕氏贈封皆一品夫人又娶郭氏以子貴推
恩賜封孺人皆先公卒與公合葬子三人長殿衡卽玉伯先生也公親
兄進士瑞符公季子公早年未有子承繼爲嗣由一品廕生歷官巡撫
湖廣都察院右副都御史娶張氏次殿璣廕生官工部員外郎先公卒
娶王氏次殿章歲貢生候選知縣娶佟氏皆郭孺人出女四人一適徽
州府通判靳治齊一適候選通判梁求正餘早卒孫四人長嵩齡戊子
科舉人次昌齡候選通判次永齡太學生皆殿衡出永齡嗣殿璣爲後
次鶴齡殿章出孫女五人曾孫一同曾曾孫女一俱嵩齡出余旣隳括
來狀所載以爲誌而并繫之以銘銘曰
盤山之陽海波萬頃鬱鬱葱葱煙閣霧井篤生偉人直大以方年如高

密仗策從

王史校石渠牒編玉葉臺柏清巖秋鷹勁捷茫茫雲夢盜弄潢池非公
持節孰底定之浙水潮平閩山烽伏

帝曰宗臣甲兵在腹元凱書癖叔子裘輕虢如臥虎屹若長城萬里龍
沙據鞍倚樹峩峩伏波勳高銅柱歸來私第白帕練裙皤皤黃髮感我
聖君有子承恩肯堂克荷後嗣繩繩家聲永大維公令德朝野所望歸
然一柱若魯靈光天不憖遺倏焉凋喪箕尾芒寒士林惆悵維三不朽
可範可型千秋紀載史冊汗青豐臺之瑩林深土厚安彼佳城是封是
盤上峙雙闕下疏丸原悠悠億歲視我銘言

原任安徽巡撫都察院右副都御史高公承爵墓誌銘

嚴虞惇

公諱承爵字子懋別號一菴先世居山東之高密明萬曆中有諱有者
遷遼東之鐵嶺遂爲鐵嶺人有生良輔良輔生景時景時生尙義從
世祖皇帝入關勦亂有功世襲二等阿達哈哈番公之考也以公貴贈
光祿大夫光祿生子五人長曰天爵官江西建昌府知府陞兩淮鹽運
使耿逆之亂抗節死贈太僕寺卿諡忠烈次曰膺爵曰錫爵公其第四
子也次曰蔭爵高氏歷世隱德不仕至光祿而大公之昆季皆位岳牧

著聲績而公之功烈爲尤顯公初以門蔭補蒙古都統七品筆帖式年雖少有幹略選授河南衛輝府淇縣知縣遷西城兵馬司指揮出爲江南淮安府同知管理邳睢靈璧河務陞揚州知府康熙己巳

大駕南巡擢江蘇按察司使晉福建布政司使到任三日

特命以都察院副都御史巡撫安徽永十月復

命巡撫廣東丁內艱歸服除

命分修南河高家堰明年

南巡閱河復奉命撫皖旋以事解任仍赴河工又明年南巡事得白尋命督理靜海漳滏滹沱等處河務公爲人精明強力臨事果斷不吐剛不茹柔不畏險難不避嫌疑所至發奸摘伏興利除弊或他人選慙恧縮不敢出手者公應機立赴莫爲持難若庖丁之於牛養叔之於射王良造父之於馬書然沛然無不如志以此收民譽而亦以此結

主知至今論封疆大臣之以才幹稱者必首及公也三藩畔渙淇當兩河之衝軍需絡繹民困輸輓驕兵悍卒稍失意則撞搪叫呼官吏多竄匿公先出庫帑採辦而後徵之民芻芟糗糧悉儲境上至卽給發檄出

境無有稽留逗撓者其尤無狀者申憲以軍法從事莫敢齟齬民得安堵而事益集民有訴其妻亡者三年矣莫得其主名公悉逮其鄰里及常所與往來者閱視之良久指一人曰汝何敢匿某妻其人色動叩頭曰某非匿亡者乃知匿亡者耳卽繫其人蹤跡之果得匿亡者寘諸法民咸以爲神京師多大猾而指揮官卑制於御史不得專決事豪右相率侮慢以爲常公受事之三日諸豪有挾妓羣飲而譁呶者公命吏執之吏曰此諸豪恐及禍公曰無恐率眾掩捕之無脫者公念此曹皆怙勢少遼緩之卽不得行吾意乃祥目吏曰此皆白丁耶抑職員耶白丁無大罪職員當請黜革耳頃之皆以白丁對卽予杖而逐之甫畢而憲符下業已杖亦無如之何當是時諸豪大猾皆斂手避高指揮高指揮之名震

輦下邳睢歲有河患夏秋之交風雨暴作洪濤怒波擊蕩堤岸一壞則萬姓魚鼈公呼召徒輩土卷掃隨方捍禦而以身當其衝僚屬切諫不聽堤卒以完論者比之王尊周甲富而儒王乙糾亡命劫之書券而悉畧其貲甲訴之州不爲理以訴公或曰河官不宜與民事公曰吾旣分治邳邳民卽吾民也民冤不得直奚官爲卒具獄寘王乙於法揚州例

供草四百萬爲防河而揚方罹水災草價騰踊費且十餘萬公請總河寬其征至以去就爭之遂得請於時元日有鶴來之瑞遂以來鶴名其堂而公廉能之聲播於遠邇達於畿甸

天子器其材遂有江蘇臬司之命公益勵精勤矢志平允以副天子刑期無刑之意每當讞獄多所平反先是有私販鹽者以拒捕悉論大辟公親鞫之問防兵幾何曰二十七人犯盜幾何曰百餘人拒捕傷人乎曰無傷鹽犯三人公曰以百餘人拒二十七人兵不傷而反爲兵所傷何名拒捕哉論其魁餘悉減等楊氏父死而訟父妾與人私生女某月日送育嬰堂者復有要人持之公曰子當爲父隱父死而暴揚其私非情也且眞僞未可知一日以事至揚猝入育嬰堂檢其籍無某月日送女事其子覘知之遂囑院移其獄於藩司公曰治獄吾職也吾能越職而問錢穀乎即日親鞫以籍爲左證其子詞屈遂伏罪欽犯賄解役佚去而解役亦逃拘其父訊之不承公飭吏密伺之有與其父相聞者執以來得一人公曰此卽解役也一訊而服人問其故公曰獄有五聽吾得其情耳無他術也粵東歲大飢公至卽發常平米賑之而後上聞

上嘉之州縣舊派里民荷擔承應過客名曰過山夫役使勞苦公嚴其禁令自募糧役舊任里長因之侵蝕花戶輸十二於官而私其八更以奴隸畜之莫敢與抗公立按糧均役之法盡革其弊民大以爲便刑具舊用鐵梨木藤約其下而貫以鐵以是訊獄鮮全活者公命易以杉木麻約之而貫以竹頒其式於州縣至今用之舊制凡監斃三人止罪印官而不及司獄公請與均罪又請罪人配漳泉者得冬月發遣以免羈禁皆報可公在粵凡舊政之不便於民者悉訪求其實大者奏聞小者檄罷聲生勢長陽施陰設大約以剛決爲主而濟之以仁恕故民畏其威而感其德去之日老幼扶攜遮道奔送自羊城抵梅嶺蓋千餘里不絕也公凡兩治皖皆不久而去其治如在粵民至今思之初公自揚州卽以才見知於

上有清廉之褒親灑宸翰賜焉後遂疊蒙恩賚非次拔擢中雖被誣而聖明洞鑒終始保全再委河務軫念勞績眷注弗衰尙將有以用公而公以不起聞矣初公之撫皖也以監臨當往江甯念太夫人年尊不忍離朝夕遂奉以行江甯人榮之及再撫皖而太夫人已沒顧瞻堂宇涕泗潸然痛親之不再至也公忠孝天植內行純備少負大志不屑紕綉

徵逐平生尚意氣重然諾讀書通大義每論古人成敗則抵掌擊節垂老猶手不釋卷好學其天性也公生於順治辛卯某月日卒於康熙己丑某月日年五十有九配楊氏繼配納拉氏俱贈一品夫人子五人其偉庚辰科進士翰林院庶吉士其倫候選通判其健太學生其佳其人女七人孫一人公既卒之幾月其偉具狀來請銘銘曰

高世隱德發跡從

龍公承其先實大聲宏始以才顯號能治劇弛張隨時導窾批卻於江

於淮閩粵之交風行燦馳除莠蘇苗名徹

九闈懋嘉乃績

六飛南幸疊荷

恩錫汝平水土克成厥功無替前勞保其初終民有口碑史有載記揭

於貞珉用告來嗣

光祿大夫太子少師吏部尚書宋公榮墓誌銘

湯右曾

康熙五十二年九月太子少師吏部尚書商邱宋公以疾終於家訃聞天子震悼下所司議卹典一時賢士大夫莫不嗟咨歎息謂公宿德舊望一旦殂謝爲可痛惜也右曾丙辰丁巳閒猥以文字之末辱公知愛

至深既舉禮部淵源文康公之門於公爲通家晚進又復從公諸子遊情好益密凡公顯懿休美著聞於

朝廷風流衣被宗仰於四方者右曾知公不後眾人又當時文酒談笑公所與游處右曾皆識之四十年來老成相次零落公巋然獨存前年相見京師猶執手感歎今又歿其尤可悲也已會孤編修君至以書來請爲銘其安敢辭公諱榮字牧仲晚歲自號漫堂世商邱人曾祖諱暘祖諱沾仕至縣令考諱權由進士起家入

本朝累官大學士卒贈少保諡文康萬歷間有名臣曰莊敏公纁終吏

部尚書則公之曾祖伯父也文康公之存未及封其父祖至公貴始贈

兩世皆如公官文康既相我

世祖公年十四例以大臣子入宿衛

先帝器之逾歲分第諸在衛者隨其文武擢用公試第一當改文資文

康以年小力辭請讀書應科舉

詔可又三年文康致仕公從歸里居數歲連丁內外艱服除鄉試不見

收

今上三年謁選得黃州府通判八年丁生母趙夫人憂起補理藩院院

判遷刑部貴州司員外郎出榷贛關歸轉本部福建司郎中詳於律例
凡遇死刑當讞不避譙責爭於堂司會通倉有獄在官百五十人負米
萬石詞連本管陰有主之者抵眾立斬而官免議公力持不可爭於朝
者閱月眾坐償負官亦奪俸時魏敏果公長刑部語公曰君爭之當危
有以他事中君者公曰某官卑何惜不以易百數人生命哉魏公偉之
出爲通永道僉事尋遷山東按察使公在部久精練法比及轉外任凡
相殺傷及盜賊夥多所平反然作奸犯科者嚴治不少縱在山東半歲
特擢江蘇布政使東南財賦累數百萬司庫多虧歷來代者遞相容隱
積久不可爬梳公至盡發其弊察出前所空闕凡三十六萬兩揭報清
刷後來者始可居而公受知亦由此始未逾年擢都察院右副都御史
巡撫江西舟抵江甯聞楚夏逢龍亂羽檄日四五至賓僚請徐行以觀
變公曰兩省連一江今上流有賊無撫臣彈壓易生變吾可逗留哉時
賊連破蘄黃左右二十餘城避兵者蔽江下無一人西者公獨駕兩官
舫破風浪直上抵湖口偵知會城遣撫標兩校出師託言無餉不發意
頗不測公立檄稅庫千兩委道員往諭之乃定省中士民聞警出避標
兵單弱公外示鎮靜而晝夜謀所以防患者裁軍李美玉袁大相密謀

聚眾以應夏逆有上變者公佯不省而陰授遊擊趙永吉方略卽夜縛
二渠斬之懸其頭章江廣潤兩門餘黨悉不問事遂帖然江西彫敝又
遭鄰警公先條病民者十數事奏除之黜貪吏之甚者然後緩征弛力
通商惠工山谷宿賊鄉里橫猾皆名捕正法振興學校風化大和清名
上聞三十一年六月仍以故官調撫江蘇公持身居官一如在江右時
承平日久雖征賦殷繁而法令畫一公遂以清靜無爲治之歲豐人和
獄盜衰息暇日搜訪古跡延接俊流杯觴筆硯相與嘯咏於湖山之閒
其他細務一委有司循舊章而已在職十又四年屢逢

車駕南幸迎送占對輒荷

嘉獎前後頒賚宸翰御製珍果祕藥不可盡書

上至親解所御冠袍賜之屢次乞身以公安靜和平得大臣體優詔不

許最後公抱小疾復請罷

上聞卽遣公子編修至偕御醫齋珍藥馳赴江南視疾狀隨召爲吏部

尙書聽過家上冢時人榮焉公熟於掌故到部吏不能欺而同官亦多

敬之無敢亂銓法者四十七年春再以衰病乞休

上閱其老許之臨行召見暢春苑凡再賜食命內侍泛小舟徧游苑中

賜御製五言律一章及廢馬珍玩慰勞再四並咨江浙盜賊事公對以
愚民無知惟蚤具獄可免株連

上是之公世受

恩不忍去國及歸而

上亦念之嘗語近臣曰宋榮在吳十餘年無一事百姓豐樂去後荒旱

盜發今日人始思之五十二年三月

聖壽六旬公馳赴闕

賜宴苑門恩賚重疊

上以

先帝舊臣惟公及保定田侍郎種玉公既誥授光祿大夫特加太子少

師加田太子少傅夏五月

駕幸口外公送於清河

上駐輦勞問復賜七言律一章公幼負俊才好讀書便弓馬嘗從

章皇帝渡桑乾水閱數丈躍馬以過

帝見大喜賜雕翎箭五及侍文康家居才人賈靜子侯朝宗輩結爲應

社公與講畫辭章討論今古故公一生好尚風雅雖出天性而根株派

別蓋有所自明季詩文壇坵黨人門戶焚香燕坐歷歷道其所以東南

名士多從之遊所獎成者率皆發聞當世未老卽屏姬侍神強氣清蘇

多佳山水恆肩兩人篋輿以便面障日流蘇玉墜須眉皓白面色紺紅

望之者如神仙焉得告後治西陂舊業用

御製當樂故鄉春句顏之曰樂春園泉石之勝甲於一方藏書多近萬

卷吳中得荆公百家詩選施註蘇詩殘本蘇子美集屬其徒校而刻之

自詩集外所著十數種並行於世生前甲戌正月二十六日終今癸巳

九月十六日

賜祭葬配葉夫人累封淑人前卒贈一品夫人側室薛以子貴贈孺人

子六基保定府同知前卒至癸未進士翰林院編修陸著皆諸生前卒

致四川布政使筠己丑進士翰林院檢討女六皆歸名族爲士妻孫男

七人如金候補主事吉金寶慶府知府岐金庠生前卒韋金華金舉人

禹金品金廕生孫女六人曾孫二人將以乙未年八月二十一日葬於

賜瑩銘曰

延世祿登眉壽運之平年有後外作牧內上卿驅坦途崇令名八十年

不家食克終始保元吉仕而優昌其詩諧律呂鳴長離封若堂松柏茂

子孫才福未究

又宋漫堂傳顧棟高

宋犖字牧仲自號漫堂文康公權子年十四以大臣子入宿衛

章皇帝渡桑乾水水闊數丈犖躍馬以過

帝見大喜賜雕翎箭五踰年分第諸在衛者隨其文武擢用犖試第一

當改文資文康以年小力辭又三年隨文康公歸里力學好古所切劘

詩古文詞皆一時耆宿洎公歿服除謁選得黃州府通判尋擢贛關內

陞刑部福建司郎中明於律例通倉有獄在官百五十人負米萬石詞

連本管部擬眾立斬而官免責犖爭之強卒坐眾償負而官亦奪俸時

論臆之累遷山東按察使司犖在部久精練名法及轉外任屢平反冤

獄而作奸犯科者按治嚴明不少貸擢江蘇布政司察出前司庫空闕

銀三十六萬揭報清刷

聖祖奇其才未踰年擢都察院右副都御史巡撫江西舟抵江甯而聞

夏逢龍之亂時賊連破蘄黃左右二十餘城避兵者蔽江下無一人西

者眾懼議緩行犖曰兩省地聯一江無撫臣彈壓慮且生變疾行至湖

口偵知會城遣撫標兩校出師託言無饗不發意頗叵測立檄稅庫銀

千兩委道員往諭之省中標兵單弱人情恇怯犖至鎮以無事有告變

言裁軍李美玉袁大相密謀聚眾應賊者犖佯若不省而陰授遊擊趙

永吉方略夜縛二渠至立斬之懸其首章江廣潤兩門餘悉不問眾乃

大定會夏逆亦殄江省素凋敝又新遭震驚犖先條除病民者十數事

黜貪吏之甚者宿賊巨猾皆名捕正法江西遂安三十一年命仍以故

官調撫江蘇江南承平既久士民尚文雅犖遂弛嚴載以清靜無為之

治吳故有蘇子美滄浪亭犖至葺其遺址暇日招文士觴詠其中一切

細務循舊章治之無所更作而下亦莫有犯法者在位十有四年歲豐

人和獄盜衰息屢逢

聖祖南幸溫語褒獎至解所御冠袍賜之屢乞身不允最後抱小疾命

遣御醫診視隨召為吏部尚書犖少侍文康公於京邸熟練掌故到吏

部人莫能欺無敢亂銓法者四十七年以衰病乞歸臨行慰勞再四并

詢江南盜賊事犖對愚民無知惟早具獄可免株連

聖祖是之五十二年三月

聖壽六旬犖赴闕恭賀以先朝舊臣誥授光祿大夫特加太子太師犖

自歸田後治西陂老圃日與故人子弟分韻賦詩故晚又自號西陂居

士云

謹案原編有山東臬司條議四事一首已見經世文編今不錄

碑傳集卷六十七

貴筑黃彭年編訂

碑傳集卷六十八目錄

康熙朝督撫下之下

湖廣總督郭公琇像贊

并序

沈廷芳

光祿大夫總督漕運兵部右侍郎兼都察院右副都御史郎溫勤公廷

極墓誌銘

李紱

中丞潘公宗洛傳

儲大文

追授禮部尚書署閩浙總督福建巡撫清端陳公瓚傳

吳蘭修

又附福建臺灣府臺灣縣

侯陳公功德碑記

張雄

又附陞授偏沅巡撫都察院臺廈道陳公去思碑

巡撫福建都察院右副都御史黃公秉申墓誌銘

方苞

書張撫軍連登靖叛事

張澍

廣西巡撫宜公思恭墓誌銘

陳鵬年

光祿大夫總督雲貴兵部右侍郎兼都察院右副都御史蔣公陳錫墓

誌銘

曹一士

趙公宏燮墓誌銘

汪士鉉

貴州巡撫右副都御史劉公蔭樞墓誌銘

陸奎勳節錄

又秉燭子傳趙元祚

兵部尚書總督浙閩覺羅公滿保墓表

蔡新

資政大夫前巡撫雲南都察院右副都御史正黃旗漢軍都統綏遠城

左翼副都統甘公國璧墓誌銘

彭啟豐

碑傳集卷六十八

嘉興錢儀吉纂錄

康熙朝督撫下之下

并序 沈廷芳

湖廣總督郭公琇像贊

余少時竊聞諸長老論

聖廟時骨鯁大臣必以卽墨郭公為稱首儀吉案公卽墨人康熙二十

十八年總憲劾高士奇王鴻緒等以張星法事降調三已心慕其人及

觀察東萊子方子寓書於余屬造廬訪其後余登公之堂見公之叔子

想其遺風餘烈因請公像而拜焉公氣節人也初宰吳江卽以廉能為

湯文正公所重繼擢御史歷臺長前後論事皆侃侃不阿而三大疏劾

權貴為尤著

聖祖仁聖剛斷悉從公言而公由是嚮用直聲震天下朝野憬然肅清

蓋非

聖祖之明燭無疆不能聽公而非公之忠誠純直亦莫能致

主惠於三代之隆也於乎盛哉公既以切直為時人所忌嫉賴我

聖祖知公素深已踏而復起開府全楚四年歸而相羊於勞山墨水閒

又十餘年乃歿平生風采可畏愛敷歷中外惟洗手奉職至臨患難死
生利害不稍動於中可謂懷忠獨立之大臣矣顧公節行若此意其人
必狀貌雄杰須眉戟張及瞻其像則真如列仙之矚昔太史公疑留侯
魁梧奇偉見其圖乃如婦人好女余於公亦云公諱琇字端甫康熙庚
戌進士仲子廷翥康熙丁酉舉人與先大夫為同年友出守吾浙嘉興
府有廉靜聲叔子廷口乾隆辛酉舉人內行純篤博學工文翰觀於此
不可以規公家法哉余忝世舊後進宦遊公之鄉邦而得覩公儀形以
慰夙昔聞風仰止之誠有深幸焉謹為贊曰
公為國紀克繼汾陽義在直諫道存至剛所過績著謚思弗忘夷險一
節如驟康莊事紀竹帛名列旂常永瞻鶴立增重巖廊
光祿大夫總督漕運兵部右侍郎兼都察院右副都御史郎溫勤公廷
極墓誌銘 李紱

康熙五十四年春正月朔戊戌味爽總督漕運兵部右侍郎兼都察
院右副都御史郎公以望闕行賀正禮感風露得疾越二十有二日已
未卒於位總督河道趙公用二日達京例疏聞
上歎悼數四下禮部議卹公故奉天廣甯人先世有列於朝遂家京師

其孤文燾文勳以公喪至京凶轉法不得入都城親重大臣得請乃入
公特奉

俞旨抵居第治喪遣禮部侍郎諭祭如典禮賜諡曰溫勤諸孤將以冬
十二月某日葬公于密雲某山故壘屬臨川李紱為誌且銘謹按狀誌
曰郎氏先世以前明驃騎將軍諱玉者為始祖數傳並襲武爵入
國朝以從龍勳舊隸鑲黃旗族始大刑部侍郎諱位者公大父贈通政
大夫諱一鶚者公本生大父實生公考巡撫山東右副都御史諱永清
以後侍郎自考以上三世皆以公貴贈如公官妣皆贈一品夫人公諱
廷極字紫衡兄弟九人公與故湖南按察使廷棟及成都通判廷槐皆
出母龐太夫人生而穎異和粹六歲讀書知求解大義為兒嬉戲有犯
者不校長老奇之稍長為文典美會三藩之亂軍興停止入旗制科乃
以門廕授江甯府同知年纔十九于清端公成龍總督兩江方嚴慎許
可獨愛公每有讞決設旁座試令聽斷輒平允盡情法于公歎曰少年
能爾他日此座屬君矣居數歲以卓異薦陞雲南順甯府知府府在滇
西徼元泰定時始設民故蠻獠少約束輒譁公破崖岸宣示
朝廷德意方春數騎馬齎牛酒出郊外勸耕稼與父老相勞苦民大悅

服土苗伏陵莽者剽掠無時至是亦息期年循卓聲大起巡撫王薦治
行第一特陞河東鹽運使將之官聞巡撫公卒奔赴一慟嘔血數升日
毀瘠血時時聞作遂為貞疾族黨為孝子服闋補長蘆舊時票商處積
習以重賅奪他人所有曰批地方保已所有曰不批地方課坐是細公
首禁絕鹽值平課亦裕旋以內憂去服除補浙江益舉漕政竟長蘆所
未及行者時有
詔天下督撫舉賢員浙撫以公應
詔即授參政道分守登萊屬邑歲祿行給賑民賴以活是歲高麗亦饑
詔發米四十萬石由登萊入海公汎舟送迎役不煩而事集三年遷福
建按察使獄多平反晉浙江布政使今戶部尚書武進趙公方撫軍於
浙繼之者為陽城張公皆海內清望公濟以和平江塘圯力任修築勸
義助濟以罰鍰成三郎廟險工建潮神祠於上訪宋六陵封植之修董
孝子墓議修甯波台州温州三府戰船以飭海防請減嚴州所屯糧科
則以甦軍困至今賴之
皇上以東南水利再幸浙萬舫鱗次供億整暇
上嘉公幹濟眷日隆賜予稠疊江西巡撫闕人特命公馳驛往權院務

逾月真領節公念封疆大吏當去煩苛持大體勝息事甯人四字於堂
恤吏愛民敬禮士大夫文恬武熙境以大和在治連八歲皆稔江右地
多山漕糧州縣危溪險澗怒濶阻運艘不可達恆以小艇木筏盤兌
里民津貼夫船費石耗米五斗三升載賦役全書歲分給如法康熙三
十八年部臣忽議駁減總督范公具情形入告奉

俞旨江右所屬州縣多處山陬百姓自願貼費將漕米運至水次者聽
從前已經支給者免追著為令至是部臣復議停給併追已給者公毅
然曰耗米非正課不當追且無耗米是絕漕運也停給而追已給已給
者數無萬將安追耶漕丁有鳥獸散耳即繕劄子以請得

旨具疏入部臣終以私見持不下公曰漕運京師之大命敢畏罪敗公
事耶將終請之給如故終任凡三劄奏再具疏漕運藉以濟公以局度
勝從容濡忍與人未嘗忤遇大事又百折不可奪如此尋奉

命兼理兩江總督益持風節裁一切陋規正已率屬無敢以絲粟餽者
九閱月晉總督漕運漕丁黠驚寬則作奸侵漁米石不可紀急則叫呼
為不靖持主者短長公撫以恩繩以法皆聽令過淮抵通萬艘無後期
亦無虧耗者浙江嘉湖白糧經費久裁減公憫其苦請如舊給發他惠

政稱是公通籍三十六年所至不為赫赫名去後常見思人以比何武
生平不宿怨小人有乘機擠公者後為屬吏不自安召而慰撫之公退
焚香讀書賦小詩自娛尤工集句有北軒集藏於家遇晚進有學行者
扶獎如不及天性然也山陽令韓煒不悅於監司以病乞免公慰留三
載比公卒煒入哭慟絕喪一日曰善人亡吾安所恃耶三日即投劾去
公恩德在人朝才知與不知聞公逝咸歎息或至出涕俸入盡于三黨
撫弟姪恩意殷篤有古人所難者歸裝不能名一錢總督兩江赫公等
賻助乃克舉其喪公生康熙二年癸卯歲四月初十日距卒得壽五十
有三夫人孫氏陝西提督振武將軍諱思克女有賢行先公卒男五人
長文傑尚鎮國公蘇爾法女授四品額駙亦先卒次文燾銀庫筆帖式
文勳以博士弟子員廕入監
天子念公勞召試西苑授文燾拖沙喇哈番補鑾輿司治儀正文勳以
應得七品官即用蓋異數也次文烈文煦俱候選部主事女四人長適
舉人覺羅恩壽餘未字孫男七人振塏振琛振城振瑛振培振均振塤
孫女三人俱幼銘曰
國家重熙太和四塞惟良惟顯元氣是宅公起勳舊耀穎綺年鴻軒鳳

舉契于清端所至有聲蕃宣屏翰作南國紀滔滔江漢長世字眈道德
是藩和風甘雨景星慶雲高而不危履信思順博陸小心萬石周慎公
望之歸隆彼三能謂松後凋而乃前衰鐘鼎旂常鴻伐斯在誰者盡傷
思趨懷懋千秋萬歲樂哉斯邱以保後生無疆之休

中丞潘公宗洛傳 備大文

中丞潘公名宗洛字書原號集雲別號垠谷曾祖守正明萬曆己丑進
士工部虞衡司郎中崇祀名宦鄉賢祖紹顯銓注台州府通府父廷選
高才生胥贈如公官崇祀鄉賢母吳太淑人潘氏為宋元樞鄭武惠王
系望彭莊析支吳區號江左甲族公少警慧肄業王谷任先生子叔祖
在陸先生偕計部吳公芥亭上舍陳君次山暨子伯兄素田胥號邑英
雋而公尤穎出嘗讀史記陝月制義篇章句胥史記同業士驚異雅嗜
青浦大樽陳公文謂河朔少年風流自賞惟大樽先生克當之既而盡
緝有明先正文所展夕權雖橫逆添加不少輟而公手搦管亦雅不屑
位置第二流嘗試于句曲振案曰此王守溪文也曹試士胥驚挹之甲
子中承宣司試第一座主冢宰徐公給諫楊公曰小講扼信好元識也
戊辰中禮部試座主大學士王公大司寇徐公尤器之簡翰林院庶吉

士肄

國書辛未三月入見乾清宮

特命翻清於保和殿列一等授檢討甲戌請假省吳太淑人乙亥冬還

院丙子

命為陝西正主考盡釐宿弊得雷公御天以下五十有三人胥秦隴工

文士丁丑閏三月奔太淑人喪辛巳還院是時大宗伯掌院學士韓公

總裁政治典訓公與分校昕夕纂輯韓公謂深得史法壬午

賜御書臨米元章帖十一月七日侍直南書房凡十八

命試蠲甘肅四十二年錢糧上諭公文曉暢懇婉獨當

上指定第一又命作大書立書恭頌

聖學詩旋

召對西暖閣垂問世系歷官年齒廷臣胥驚企之十二月十八日

命九卿保舉學臣十九日又命凡會保八人而韓公特保公

命提督湖廣學政二十三日召學臣入南書房

御試夫子循循然節經義恭和御製考試歎詩公復第一翼日內侍首

宣公

特賜御書朱子六言詩一幅而其它以次賜者胥朱子五言詩且五言

裁咏一時而六言彙咏四時也癸未正月朔復獲

賜松花江石硯遂以夏四月涖武昌任蓋實埒於撤御前燭書玉堂署

之盛事而榮陽潘氏繇左丞騎省太常後其視宋中書舍人良貴元學

士昂霄明太常少卿辰雅以文章顯禁掖者才暨遇且胥不翅度越也

顧公雖繇詞苑起家而丰裁特稜峭首鉤勒

御製考試歎詩於武昌府學以風勵學官而附鏡恭和詩曰惟知感

君父甯敢徇私情又著自警箴曰甯破情面不負

朝廷凡竿牘苞苴槩屏絕疏劾光化教諭艾某以警其餘繇是湖南北

文武隸學籍數千人無敢以貲進者楚人士謂百年來所未有雖山陬

湖澁胥尊憚之楚學政滋弊名不揭案而潛附冊者曰附案名沿宿案

而人或至八九易者曰鬼接頭撥它郡邑以就厚貲者曰飛過海公胥

禁絕楚風為一變公覈權文藝漏率強半雅以李懷麓胡二泉郭明龍

郝楚望吳曲蘿李湘洲愚公石季常鍾退谷譚友夏金子駿曹石霞諸

先正為宗國朝尤尊劉克猷熊鍾陵二先生涖試里塾輒驚傳曰某某今果第一

矣或又曰曩楚人謂董尚書思白葛太常祀瞻號極明公實過之武公
者率無敢易甲乙而歲癸巳常熟嚴公寶臣主楚試癸卯長洲惠公仲
孺主試公所鑱楚牘標新集中式幾盡此尤以徵黑白蒼素經義自分
而老於文者之所見略同也公雅善待士漢陽勞君必達許君之楨黃
岡靖君道謨衡陽王君敬宋君薊齡邵陽景君篋興國成君斌邁嘗入
分校胥用賓主禮邵陽王君元復車君無咎甯鄉張君達善化李君珏
胥力延致孝感陳君陞謀才最高而早卒尤痛惜之而公拔擢士如大
學士彭公太常少卿張公等數百人胥克爲當世用公勤護士類不少
憚懾黔陽令疊杖士牒制撫曰儒學非臨民之地公堂非辱士之區如
以爲民則不應又有明倫堂之朴責如以爲士則不應先有縣治之朴
責令詞屈旋以酷黷黜桂陽郭君遠試弁其曹者十令憾迂戇假它獄
請褫讞之公力持會巡撫趙公亦聞其名乃免而遠亦後舉辛卯試楚
人士所尊郭來倩先生也公雅惜天門孝感黃岡武陵諸名邑童子試
或至六七千人員限於額嘗題改黃梅中學爲大學雲夢桂陽小學爲
中學比再蒞楚又題改安鄉中學爲大學而公識畫尤經遠嘗疏請曰
近日大兵所至以亘古未服之紅苗畏威懷德咸願歸誠臣謝遣護卒

人役不持寸鐵而未嘗聞犬吠之警有以信

聖世之德威遐暢而亦有以知苗人之非性惡而不可化也惟是永遠
綏懷之策旣行奮武於前宜卽揆文於後請敬陳之大抵生苗之蠢動
繇熟苗之句引爲奸而熟苗之不馴繇漢民之膜外異視是故撫苗之
法當先施於熟苗必使熟苗之性漸馴而後熟苗可化爲民必使熟苗
漸化爲民而後生苗可化爲熟今

皇上視六合如一家蒼生皆赤子奚有漢苗之分生熟之別而事有尙
須酌定者卽如考試靖州之通道縣分編五里一漢四苗各輸租賦而
應試者止有漢民一里夫以歸化百年之久而尙有漢苗之分應試不
應試之別漢民指而目之曰苗則苗亦不得不自以爲苗此則通道之
熟苗可爲矜憫者也臣查湖南新化安化兩縣在宋時名爲梅山尙係
生苗巢穴一歸版圖人文漸盛中進士舉人者每不乏人人不知其爲
苗彼亦忘乎其爲苗矣以彼繫此新化安化之苗何其幸而通道之苗
何其不幸其餘各府所隸州縣有熟苗讀書童生因例不送考往往向
臣陳訴是則可爲矜憫者又不獨一通道也臣愚謂熟苗之歸化有已
歷三十餘年者如願改入漢里卽應許以民籍應試漢里生員童生不

得阻抑其取額不必加增其卷面不必分別要使漢苗無殊以宏
皇仁無外之義行之既久文教誕敷則熟苗可化爲民而生苗可化爲
熟未必非南楚久安長治之一策也疏上獲

褒旨這本說得是該部確議具奏部議應如學臣請復獲
俞旨而楚苗繇是彌帖伏矣此又公之綜緯荒遐洞貫樞要匪直以文
章競雄也初公滋楚盡汰部科費亟議鑄調輒不允最後復以字畫譌
錯搃之而

旨仍留故任丙戌入都迎

駕於三山廟蒙

垂問來期公行十步復遣侍衛走騎來視公乘馬訖迺返翼日入謝

上語內侍曰此卽曩草蠲甘肅錢糧諭旨翰林也丁亥選書淵鑒類函

序又編纂

御定子史精華賜松花江石硯公至是凡獲三賜焉戊子充日講官起

居注四月十五日

御試侍郎以下百六十三人於澹甯居而題則五畝之宅十有三句經

義也二十一日宣

旨公名復第一是秋

特簡順天正主考釐弊尤峻得朱公綸以下百九十有九人胥京輦畿
輔才士公凡三司文衡胥號精鑒而是科繇九門提督鄂公禮部右侍

郎鄧公下百餘人胥克爲時宣力焉己丑三月

特擢詹事府少詹事尋擢內閣學士兼禮部侍郎充殿試讀卷官庚寅

充經筵講官又總裁政治典訓掌翰林院掌院學士印公听夕權譯葢

典訓初集百卷又恪遵子史精華

聖諭逐部歸類每類編事一類中繇子而史而胥蘄衷於精詳典雅葢

稿二百卷先晉天文部四卷復薦文解常熟陶公貞一海甯查公雲標

以校勘之此尤儒臣文章報

國恩之盛事而徐騎省英華楊學士冊府諸書胥匪倫擬也顧公才暨

器識雅可大用而

聖主知之尤深辛卯三月復擢巡撫偏沅等處地方提督軍務兼理糧

餉都察院右副都御史二十六日陞辭

上諭居官安靜操守寬和暨紅苗軍實諸事二十九日復賜天閑鞍馬
公遂以夏五月蒞長沙任先是巡撫趙公首釐稅政而閒不克根株斷

之署篆又亟易賦繇經制式外耗滋益什之二三又有餽節稱觴費見
芹敬諸儀謝篆謝計諸特獻公胥禁絕而承宣司之加平倉使之贈耗
郡守之季規亦檄准此州縣裁存趙公例耗一分它胥禁復嚴禁豪右
占固牙行利州縣株連訊讞暨里閭起滅訟者民浸少蘇會商王綱明
黨請給開採牌六月公亟疏題封禁曰戶部咨商人王綱明稱鉛山不
禁不獨鉛筋易得而鼓鑄亦不遲誤應令其開採臣亦何容置喙但臣
受
恩最厚理應知無不言言無不盡況前受
訓旨首及安靜誠為至言大抵與一利則必生一弊故治民之道擾之
不如安之動之不如靜之也今部議開採有大不便者請詳陳之臣前
任學政時考試湖南親身徧歷確見衡郴等處產鉛地方山深谷邃境
通黔粵人雜苗獠惟宜安靜不宜擾動今臣復檢查開採禁止根繇蓋
自康熙十九年聽民開採彼時輿情皆言貽害非淺督撫乃次第封禁
然而奸貪之徒尙有赴部請開者移查屢覆案卷炳存幸賴
聖明洞照于四十二年奉
旨聞開礦事情甚無益於地方嗣後有請開採者槩不准行然後奸徒

絕想地方甯謐者於今八年皆賴我
皇上特旨之所賜非督撫諸臣之力所能為也今戶部頓忘
明旨創為聽其開採之說臣不解何故道路喧傳以為商人浪費庫帑
虧欠難完所以朦混戶部借名採取白鉛以資鼓鑄其實希圖偷竊黑
鉛銀礦以飽囊橐夫愚民何知利之所在身命不顧彼見雇募工價勝
於力耕必將爭趨競赴田畝拋荒正賦漸缺其不便者一山中多一夫
田中即少一農生之者寡食之者眾米價立見騰貴貧民立見乏食無
論湖南之米不能不濟江浙而境內先不足自贍倘致失業流離必
須多方救濟則雖商人之虧欠補清終屬得不償失其不便者二深山
封禁有年不無居民廬墓遷徙損傷情殊可憫其不便者三苗獠生性
好利若見土人開採必行劫奪彼此格鬪必有殺傷文武官弁私貪陋
規隱諱重案必釀禍階其不便者四且開採一節竟有挖未深而砂已
盡者如此則必商人之虧欠愈多自顧不暇其招集之眾易聚難散或
起盜心或竄苗穴地方自此多事萬一至於興師動眾則軍需糧餉商
人能任之乎其不便者五臣忝任封疆若畏首畏尾不敢早言異日一
起事端乃為焦頭爛額之舉則身受譴責不足蔽辜誠不得不為未然

之過慮也是以不避仇怨密疏入告伏乞
勅部永行封禁則湖南億萬生靈俱享太平無事之福而臣區區愚忠
愚孝之心亦得少安矣蓋山澤之產至宋紹興而已大竭明左都御史
軒公覲清操號軒耿提刑浙江請停溫處銀場額課中外胥撓之遂召
鄧茂七之亂公清類軒公以卿貳監司守令暨猾胥豪魁所競奪之金
穴獨敢砥柱計部且不少憚懾中傷抗疏力爭而中外訖欲撓之而不
得此以徵
國家之仁逮榛箐蹊微而公言業以行雅可亡憾也衡陽安仁水衝失
額田九十三頃有奇公請豁部駁例三分免一公復疏水旱災傷例應
開明分數原以禾稼被災而田地旋可種植故照被災分數按數蠲免
今衡陽安仁田地塘畝實係沙磊崩塌衝決失額田既驟難墾復賦稅
從何措辦似不可與田地無損者例論也迺獲豁臨湘水衝田四頃九
十畝有奇亦力請豁之又請免墾荒之期俾民益滋墾闢請禁楚民鬻
產入川擁議捐俸積穀減糶法裁郵遞規例而嚴毀郭氏溺女碑族罰
昆弟競產者蓋至祈於衡嶽而毒草絕禱於湖而輒雨歲屢豐稔民大
和會故湘潭河道陳公嘗推論曰潘公清而和衡陽王君桂陽郭君亦

時時稱說之而如以廬陵之代合肥為口實則又與於陽譽陰構之甚
者也公周覽湖湘嘗特疏曰臣前任學政查湖北府縣衛學六十有九
額取九百一十四名湖南府州縣衛學七十有七額取九百九十五名
總計湖南進學額數較湖北更多湖南能文之士較湖北相等祇因中
隔洞庭每遇鄉試正值秋水汪洋之候貧士拮据資斧行至湖濱一遇
風濤險阻守候誤期有志之士或至痛哭而返甚有科場期迫念切功
名揚帆冒險瞬息而遭覆溺者以致多士畏慮裹足不前其能至武昌
入場者十無二三每科中式舉人不及湖北四分之一諸生成向臣泣
訴求請分闈分額臣以江南陝西例卻之及任巡撫辛卯鄉試亦如前
拒絕今

特恩開科士情踴躍咸有上進之心彌切望洋之慮情願自捐廩糧等
項蓋造貢院懇求代題臣思湖南隔越洞庭實與江南陝西水陸無阻
者不同倘憐其跋涉之艱難鑒其愛戴之真切
特恩破格另差正副考官二員至長沙考試分中楚省舉人額數之半
則不特湖南士子感激高厚而土司紅苗亦快覩文明矣蓋至後十年
而公創議訖行遂與宋時湘賦埒其識慮之經久而不易者若此公經

緯兼肄勤練標兵覈月饒嘗
詔偕提督勘邊繇鎮軍司城北行二十里至朝陽營出垣入苗地紆折
五十里返德勝營翼日輕騎馳四十里陟毛都塘山頂俯瞰黠苗吳老
鐵寨麾從騎張左右翼而遣百戶寨長往諭之遂輸誠又巡乾州出入
苗界二百里凡上至亭子關下至喜鵲營移營汛邊垣外者一十有八
羣苗底定合奏厥功爰碑平苗以永鎮之此又潘氏金華司馬惠州湘
頭婺源制院思恩山陽僉院青羊山之曩烈也顧公潔己首公盡汰部
院費都察院尋以矜可減等議鑄調賴
聖鑒不允而公涖職自如且公在湖湘一日則黑鉛終不可得而服取
也繇是媒孽者眾滋而公亦尋以癸巳歸矣乙未復構偽券案事尋白
而公之所自陳不避讐怨者誠確也丙申冬請埔工假歸十二月卒年
六十公事親孝通議公暨吳淑人喪胥致毀事兄樵溪公悌慈兄子承
棟如子遇族戚胥有恩意事在陸先生暨知舊遊從克以敬信肄業如
長洲徐公葆光泰興朱公青選陶公查公暨余弟在文等清茗談藝不
少勅公嘗獲
賜御製詩集古文淵鑒諸書古文辭上宗史記詩繇玉溪詣少陵集二

十卷而大文繇其關於館閣臺院中之業者書之它不具著淑人蔣氏
曾祖允儀明光熹時任御史咸甯點將錄所謂八標騎之一也後拜撫
治郎陽右僉都御史祖善源籍六館父和鳴籍校母徐孺人淑人有婦
德事吳太淑人尤恪克枋其家用俾公無內顧憂先公五月卒年五十
有九公誄行曰吾所以能堅絕苞苴無患得失者繇淑人治家之力衣
食麤贏雅無藉以一官為賈販也此尤與曾文定公列女傳序義指符
爰附書子二伯承柱籍六館以勤勤卒於埔工蘊仲承權知山東東平
直隸州有政聲孫文照文勳胥靳克緒彭莊業者也
謹贊曰公入楚峻陟衡參巔遐眺賦詩蓋太史公浮游名山巨川之奇
氣也其形體清羸而疏事陳義致極壯礮逢辰奮庸族談動色紀臣績
者將不口哇手畫標指為一代偉人乎哉
追授禮部尚書署閩浙總督福建巡撫清端陳公瑣傳 吳蘭修
陳瑣字文煥號眉川海康人幼穎異好學為人清介簡重康熙癸酉登
賢書甲戌成進士 志 授福建古田令以才能調臺灣有惠政貧民渡海
謀生苦船丁要索禁革之 南樓文集見四十二年行取授刑部主事遷本
部員外郎又遷郎中四十八年充會試同考官出任四川提學道

聖祖仁皇帝誠飭四川官員加派恣肆諭及瓊任學道操守清廉福建巡撫張伯行奏請以瓊為臺灣廈門道

上從之見錄道臣兼理學校瓊至以興化易俗為先鼎新學宮建朱子專祠示諸生以正學勤宣

聖諭海外蒸然向化時吏治少媮瓊率之以廉衣御布素食無兼味所屬憚之治績甚著五十三年超擢偏沅巡撫入見

聖祖目之曰此苦行老僧國家之瑞也見集南至撫閩疏言防海之法謂臺廈海防與沿海不同沿海之賊在突犯內境臺廈海賊乃剽掠海中

自廈門出港同為商船而劫商船者即同出港之商船也在港時某商之貨物銀兩探聽既真本船又有引線之人一至洋中易如探囊取物

故臺廈防海必定會哨之期申護送之令取連環之保今令水師哨船書某營某哨於旂上每月會哨一次彼此交旂為驗如提標水哨至澎

湖交旂澎湖至臺協交旂俱送臺灣鎮驗臺協水哨至澎湖交旂澎湖水哨至廈門交旂俱送提督驗若無哨旂交驗即取某營官職名某月

海洋有失事則取巡哨官職名則會哨之法行矣廈門至澎湖商船不宜零星放行候風信順利齊放二三十船臺廈兩汛各撥哨船三四護

送至澎湖交代各取某日護送商船自某汛出港至某汛並無疎虞甘結按月彙送督撫衙如無印信甘結即以官船職名申報則護送之法

行矣商船二三十同出港時把口官逐一點明各船貨物搭客及器械填單取各船連環保若遇賊必首尾相救如不救即以通同行劫論則

連環保之法行矣疏下部議以防海已有定例所奏繁瑣難行議覆上是瓊所奏如所請行是年兼攝閩浙總督五十六年卒於官年六十

有三追授禮部尚書凡祭葬立碑與謚皆照尚書例并廕一子入監讀書尋

賜諡清端廣東巡撫楊宗臣以瓊子居隆居誠並舉人請廕孫子温部

議從之見錄瓊為張伯行所薦稱天下清官其撫閩與伯行相後先

伯行清慎而性多凝滯瓊易之以簡易初雷之東有洋田萬頃堤岸水

聞為海潮沖激日就圯壞瓊常憂之及官巡撫遂請修築聖祖下其議因鳩工興築海遂二邑蒙其利焉見集南乾隆六年

恩賜其孫陳子良舉人十三年以原廕之陳子温未仕而故允部議補廕瓊孫陳子恭授刑部員外遷郎中出任知府見錄

又陳清端公傳賀代伯

陳瓊號眉川海康人康熙甲戌進士起家古田令調臺灣令行取入都督四川學調臺灣道旋撫閩薨于官贈禮部尚書謚清端公清操絕俗自奉尤菲蓋草具粗糲日噉薑少許而已而特捐置學田贍諸生焉增書院學舍聘蔡文勤太傅主講以女傅所著學約下各府州縣九郡之英萃于一堂蓋書院于是始有主講肄業生加多焉初令臺灣引諸生考校教以立品敦倫夜躬巡閱讀書聲則重獎之其勤教化以厚風俗蓋素然也既薨士奉主祀院祠政跡具府省名宦傳

又附福建臺灣府臺灣縣侯陳公功德碑記 張雄

古稱吏治尚矣召父杜母昭垂史策豈求之今果無其人歟良以士君子讀書懷古侈談經濟及一行作吏輒忘素抱者多也若我大邑侯陳公毓秀於英靈壯年掇巍科重藥榜不以富貴櫻心不以仕宦棄學當其製錦古田也政蹟彰彰亦既孔邇興歌父母咸戴矣方今

聖天子勵精圖治車書大一統之模聲教遵四訖之休而於親民作牧縣令之選尤慎且重壬午春臺令告缺督撫喜公廉能為最上其事於朝得改古田之任而調臺焉夫臺新闢海宇登版圖者方二十餘載環大海而阻巨洋舟車輻輳番民雜處治人治法相需甚亟也公至之日

以興賢育才勸相農桑為先興利欲滋去弊務盡不憚煩劇之勞寓撫字於催科故案無留牘而野不苦追呼去歲秋成失稔雨澤違時抱己飢已溺之痛開倉賑恤民賴以生竭誠致禱甘霖立應且按期課士而文風為之不變絕苞苴杜請託被絮飲藥安之若素要皆秉性廉明長才碩學始能忠國愛民治行可風方古循良之吏其又何歎焉於是臺之父老頌公之功感公之德咸忻欣然不惜波濤之苦相與渡海東來扶杖至止懇懇為余言惟恐上考榮遷不得長蒙其治化預擬匍陳上憲冀遂借寇之願屬余數言以紀而勒之貞珉於不泯余思縣有神君百里稱平公之治一邑者如是他日立朝端宰天下亦當如是矣然則公之功不可沒公之德不可忘余偷息梓里竊被鄰治之光不揣固陋妄徇父老之請不覺樂紀其盛見海邑巖疆得公之宏猷碩畫寬猛相濟張弛得宜自能鳴琴奏績治登上理垂勳名於永久以為後之膺民社者法也公諱瓊號眉川甲戌進士廣東雷州府海康縣人

一開倉救凶活命數萬 一詳豁水丁恤窮民數萬 一征額銀祭丁及各祀壇不費民財 一賦粟聽民自執斛蓋 一平戩完餉 一捐俸修整道府縣衙署不費民財 一革去污吏蠹役 一

尊師重道捐俸建立明倫堂不費民財民力 一捐俸築蓋倉廩不
費民財民力 一革去徭役什費不費民財民力

康熙四十二年十二月十五里一莊子民公立

又附陞授偏沅巡撫都察院臺廈道陳公去思碑

公諱某號某粵東雷之海康人也性廉潔甘淡泊所學以程朱為宗非
聖賢之書不讀由甲戌名進士出宰古田即以廉能改調臺邑渡海以
來美政相續

聖天子嘉厥丕績不俟秩滿擢入秋曹臺人士輟板轍臥不遂借寇公
亦快快登舟以作興吾臺者猶未備也時勒石誌德以永瞻依過其下
者咸嘆慕仰企復乃天從人願中丞張公以吳撫繫念海疆薦公巡宣
島外時公督學川省破格允從從涖臺之日歡聲騰沸遍道聚迎婦女兒
童亦識為司馬相公復來也不特民喜公亦喜甚以前所未得自便者
今可一意舉行視事之後即釐別積弊數十端巨奸豪蠹斂迹遠竄凡
有便于民者不動聲色煥然一新數年來臺民樂利於堯天舜日
中者孰非公之賜乎碑短政多難以枚舉其最切者如建社倉以備旱
災歷郊原而詢疾苦甲午歲饑減騶從單騎履田閒灑勘或為請蠲或

為緩徵至於街坊市肆貿易雜夥而供億無聞公之於民也至矣建學
設塾宗祀先賢親詣賢宮講明絕學環諸生童子於旁示以作文關鈕
公之於士也至矣嚴部伍申紀律戶籍虛者補之苦樂偏者均之未嘗
以細微之事復使行閒公之於兵也亦至矣迺其自奉甚薄菜蔬之外
無餘物官庀所入饒有餘資公惟取以修建郡邑文廟啟聖文公文昌
名宦諸祠及祀典所載如社稷壇祭餘俱封儲府庫雖以萬計淡如也
且其勞於事也鷄鳴而起夜分不寐連餐旰食愛公者屢以意請而公
不答蓋知謀國而不知營家知恤民而不知愛身其天性然也臺例三
年即遷公自庚寅涖臺癸巳秩滿臺人士蜂擁蟻附詣各上憲懇留疏
奏得請民呼萬歲

天子特擢公開府湖南聞報日闔郡悲喜交集喜則喜公異典超陞為
古來所未有而悲則私惜其去也斯行也不敢復仰扳轅計羣道公為
九重特識不日爰立作相將來坐廟廊理天下島外雖遙呼吸相通公
雖去公實未嘗去也郡人戴公者誠思公者切其豎斯石重誌公德僉
曰斯石可泐公德不朽

巡撫福建都察院右副都御史黃公秉中墓誌銘

方苞

右副都御史黃公既歿之逾年其子廷桂因李君枚臣來請銘余聞公名在丁亥戊子閒時江浙大饑

天子並命發粟以賑而吾鄉有司失方略骼骹布路奸民朋聚正晝剽掠於時則聞浙之祲尤大而民不阻饑惟黃公之功其後訊之浙士大夫多曰公功豈獨在饑者吾浙有二中丞

國初起瘡痍致生聚者曰范忠貞公其後備荒政遏亂萌者則黃公是吾民所尸祝也蓋公之撫浙也在戊子之冬承大嵐山案後浙東西郡縣皆蕩恐而杭湖二州連饑民心搖搖前中丞出則羣噪憂惶引疾時

公以內閣學士賑湖歸報至中途就命無浙雖浙人亦不知公計所出也公至則懸禁不得抑米價陰偵旁郡閉糴者而重懲之為書告糴鄰

省散庫金於典肆約逾歲歸其本勸富民分災而禁貧民之羣聚要索者會溫台二郡大穰復奏開內洋遠商總至浙人皆曰吾父母妻子得

保聚矣公始至浙卽以便宜截留漕糧十萬石時長平倉粟皆虛巡撫將具劾羣吏公曰吏盡黜何與饑者彼官存粟猶易致耳因設方略俾

多方補苴卒賴以濟浙民既蘇公方設政教而移鎮八閩時海賊鄭盡心聚黨出沒

上命會勦制府提督各以事諉公刻日獨進而懸賞格得其魁者千金抵厦門厲氣巡軍忽轅門鼓三賊鄭盡心已為其黨所密首捕得之矣

時康熙五十二年正月十日方公之未至閩也鄭盡心既嘯聚海隅而山賊陳五顯亦相應和盡心既獲五顯亦就撫而公官罷聞命卽送符

篆俾他人上之而不有其功先是湖杭二郡緩征康熙四十七年漕糧部議并於次年補運公疏請分年帶徵三請始得

命次年復奉部檄帶運時二郡米價猶踴又已過開兌期督糧道請折價分授運弁沿途採糴布署已定而公去浙運弁乾沒糧額缺遂挂吏

議公既罪歸上惜其才復命督理子牙河給原階而公竟卒其始知黔西州嘗單騎

入黎平徭洞折其酋使受約束始入臺有所陳會上以他事震怒宰執目公使下而公直前必申所請居臺中五年所條

奏皆闕大體而謂御史司彈劾不宜兼任保舉中人捧綠頭牌傳旨宜關內閣登籍以便稽核改逃旗人連坐法尤人所難言者公自內

擢所居皆清要卒秉節鉞兩鎮大藩可謂遇且顯矣其卒也年六十有五而浙閩之民及海內士大夫知公者莫不相聚太息恨公之無年而

五而浙閩之民及海內士大夫知公者莫不相聚太息恨公之無年而

五而浙閩之民及海內士大夫知公者莫不相聚太息恨公之無年而

五而浙閩之民及海內士大夫知公者莫不相聚太息恨公之無年而

惜其才有未盡試焉公諱秉中字惟一家世瀋陽人祖諱憲隆父諱道明俱贈如公官妻孫氏誥封宜人先公卒子六人廷鑑候選知縣廷鈺戊子鄉試副榜陝西平涼府靜甯州知州廷鉞早亡廷桂三等侍衛廷鏃廷銑太學生女二人公卒於康熙五十七年正月十五日以某月某日葬于某鄉某原孫宜人附銘曰

公起蔭子厲學聞顯未壯出宰厥猷已遠入更二曹陳議不苟悚其長官與相可否遂踐中臺屢正邦鈞承使備禮羸黎無呻就加顯命開鎮南服為父為母是鞠是育眾心有依孽萌弗孕如器將傾得公而定公按閩疆劇盜就梏海波不驚山無莽伏蹇罷僨駕萬口同咨惟民之故匪公之私

帝眷有終民不能忘徵此銘文久而益光
書張撫軍連登靖叛事張澍
撫軍氏張名連登陝西長安人康熙四十九年授湖北按察使會值萬壽巡撫劉殿衡祝釐于武當山總督額倫特以湖南地畝不清駐節長沙行丈量公獨在省視事夏四月三日為公覽揆辰先四日日映觴客于署西偏之揖青軒酒三巡門者來附耳語公起如廁俄而侍者傳

言公腹痛命七郎主席少選又傳言疾稍可行且出請坐客盡歡毋停爵旋命閉門毋出從者且有犒良久復白曰公疾良已方理文書畢即與諸君痛飲耳各皆屏息俟忽聞傳鼓聲公已升廳事諸客乃問侍者曰何為侍者曰曩者公稱疾偽也適有僧自卓刀泉來上變屏人問之則云有王爾寅陶二者嘯聚漢鎮備軍器私署文武將以公生日為不軌以某有膂力遣其黨李二李五等突入寺齋之曰從我則貴不然死劔下某伴喜飲之酒餽得其實今爛醉矣可速禽之公如其言密遣王司馬渡江跡所在羣賊方酣寢邏者圍之排牆入大呼捉賊羣賊驚起曰呀水發矣水發者方言消息漏也遂械其頸靡得脫者今至矣於是四座聞言皆錯愕罷酒公驗問得諸囚反狀下之獄旋出教曰反者某某也于眾人無與所得誓書愚民不無望名其中然皆非其本心已焚之矣汝等各高枕毋為浮言所搖明神可鑒予不食言是夕烏合者轉相告語各鳥獸散晨起僚屬來謁公語之故且曰昨倉卒時非不欲使君知之恐涉張皇敗乃公事故乘深夜黨羽未集卒然禽之眾皆稱謝曰非所及也會報至長沙從官皆懼額曰張某司在自能辦賊其報至武當也亦然越十餘日兩公馳歸見公即勞之曰君不動聲色了此大

事我兩人將入告得懋賞矣公曰不然此事上聞必下九卿議往返牽制動經年月疑者日眾轉相扇動恐致變生肘腋陸宣公云宥之以恩則日新者咸思歸命斷之以法則懷懼者姑務偷生良為名言某昔守青州饑民攻城掠食惟禽其元凶二三人置之法餘悉不問四境以安況重臣得專制闔外乎不如勿煩聖慮便宜從事命反側子自安儻遭吏議某不愛一官以紓楚國之難敢過望耶兩公歎曰賢哉此盛德事人情所難而君能之此座不久屬君矣然此中有姚道人者亦大憨也未獲奈何公曰搆之兩公曰何時可獲公招指曰七日曰何速也公曰某比訊諸囚云其人肥而多須黑子著面成塊可寸許毛叢生年五十上下詰其地則云景陵西鄉是其舊游處已下檄縣官繪圖往緝矣計日可至已而果如公言公乃推勘再三多所平反遂取其魁七人杖殺于黃龍山下之閱馬廠餘皆區別處分或遣還鄉井多鄰省人也當是時父老子弟環立如堵皆以手加額歡聲動地俄而

上知之謂公從容應變動合機宜可參禁密徵為卿貳此事常甯段獻生嘗紀之文辭冗陋予以公為鄉邦偉人今且不能舉其姓氏因采段氏說而書之以告鄉之士大夫稱撫軍者公于五十五年内升五十七年五月出為湖北巡撫云

廣西巡撫宜公思恭墓誌銘

陳鵬年

深及公被誣去位

天子命予攝其事余為料檢其遺牒稽覈其治迹益嘆公之天資醇厚被服造次必於儒者簡易近人而人自息之非公之過也天下枉者惡直邪者醜正從古而然而陰鷲險狠者多中人於不意公之遭遇非人固然其無足怪而予承公餘焰未息之後故其患難畧同而其知公也乃益深戊戌之夏公邀

聖朝賜環之典昇公豫藩即晉公粵撫前此薏苡之謗不辨自白無何

出山未久德星遽賈人於是思我

皇上嚮用之殷所以保全之至而惜公之未究厥用也今將歸窆於東壩之原其嗣君廷棟來乞子銘以予能言公之行予是以不獲以固陋辭謹按公諱思恭字允肅別自號省菴襄平人其先公以佐命勳撫軍八閩世襲一等阿思哈尼哈番公為任子雅嗜讀書平居手不釋卷初

以蔭授楚南之茶陵州下車勤恤民隱課農桑禁私派嚴保甲立義學
教養並行至今茶民德之以秩滿遷工部虞衡員外郎出爲邢襄太守
雖兼轄九邑而撫字常如一體地有河患三日漳曰子牙曰安定
當宁憂之每遣大臣經理其役然營度費畫必與公俱功以克奏其自
爲疏鑿者則本部牛尾一河灌溉之所永利者也時安溪相國李公巡
撫畿南屢疏薦之是以
宸衷簡在超擢直隸守道旋陟江蘇藩司兩任皆錢穀筭鑰羣僚弁冕
公悉心釐剔裕國富民不減劉士安之風雖惇大和平而正己直行不
媚上官氣節矯然爲方伯之時予承乏金陵再守吳郡公不以予爲不
才引與同事若芝蘭之臭味無有差池蓋其性情有相合者康熙四十
六七兩年江南水旱頻仍迅詳入告邀
恩蠲賑公則躬督屬員實心實惠普暨窮簷所謂來旬來宣公可無愧
矣然而民愛之益篤人忌之益深適兩江大吏至嫉公耿介又以要求
不遂以擲帑奏劾
欽差部院大臣往按其事獄成幾至不測矣賴
聖明洞鑒特賞其罪放歸田里丁酉之秋

天子恩念舊勞復加顧問公奏對稱

旨廷臣又交薦公居官廉潔愈見前參之誣乃復畀公以維藩之任往
尹天中公感激

殊恩益自刻勵豫省重耗累民下車首爲禁革瀕河州縣秋水泛溢勘
不成災公自捐橐賑之新設駐防官兵一切營造公與楊大中丞竭力
鳩工不以擾民其頒布條教有但知有

君上不知有情面但知有百姓不知有官吏等語斯亦可見其爲政之
體要也已莅任半載百度具舉

天子知公可大用遂予節鉞巡撫廣西廣西地瘠民貧內雜猺獞外控
土司號爲難治公至懷柔綏輯威惠著聞

上諭十六條教化之先資也公爲之逐條講解摘引律例演繹成書飭
有司不時宣講剴切詳明由之感悟遷改者甚眾又設華掌書院誘進

秀良其留意教化類如此其陳奏土屬事宜皆關安攘要領故嘉謨入
告而

上輒報可治粵載餘吏畏民懷風行草偃不事鉤距人自不欺四境肅
然枹鼓稀鳴大都以德化民正柳仲郢所謂郡邑之治惠養爲本者也

公為人廉平寬簡不立畦畝終身無疾言遽色而綜理庶務詳慎周密
皇上兩次南巡一切供億竭誠祇候
天顏喜悅錫賚有加又御書箴白堂以

賜公書萱日松年以

賜公之母公之得

君如此其至故奪情於江藩起用於廢吏非為其有民功而然與然而

公之得

君也不以為喜其失權於上司也不以為戚前導後擁也不以為喧門

羅逕苔也不以為寂翛然泰然寵辱不驚其殆庶幾乎古之學道君子

矣公生於順治十五年九月初十日丑時卒於康熙五十九年六月二

十四日寅時得年六十有三元配夫人趙氏繼室夫人張氏子四人長

廷棟候選同知次廷樞候選知州次廷桂次廷棻其才具皆能繼公之

志世其家者乃為之銘銘曰

魯有三黜楚有三已喜愠不形為道之以鳳皇為聖王之瑞而鴟梟惡

其不類已然射工沙蜮有時滅跡而德輝反因之以蔚起公其安斯吉

兆以妥其神靈而宜爾孫子

光祿大夫總督雲貴兵部右侍郎兼都察院右副都御史蔣公陳錫墓

誌銘曹一士代某

雲貴總督雨亭蔣公以康熙六十年八月二十三日卒於西藏雪山山行

次王事也越雍正九年十月七日葬江陰縣香山桃花澗之新阡先期

嗣子漣乞假於朝而來告曰自先公歿十有一年龜筮未從葬是以緩

且昭信勒銘有待今日敢泣涕以請念與公同舉進士惟余在又敢固

辭按狀蔣之先名秀亢者以平吳功食邑常熟其後世居城南明崇禎

朝禮部主客司主事贈光祿公諱葵始以科第顯於公為王父生贈光

祿公諱伊康熙癸丑進士由庶常授監察御史著玉衡臣鑒二錄繪時

務十二圖以進視河南學以勞卒官公考也生二子仲為今相國太子

太傅公而公居長諱陳錫字文孫別號雨亭登康熙乙丑進士二十八

年令陝之富平歲旱蝗米斛錢數千

詔以倉穀賑就食者眾將不給歎曰賴

君之祿以有產斥吾產

君澤當益廣且民皆吾子安有子瘠而父忍獨肥亟為書家中鬻田繼

之半載完聚如初狀聞陞禮部主客司主事督海運倉革糧艘之以蓬

席銀納者遂甯張公查子粒至陝民遮道迎訴公德遂甯歎曰其家之
不有奚有於子粒還薦治行第一遷祠祭司員外郎佐張公治河兩淮
一載授濟甯河道條濬長河六事行之革燒草公茭葑水利臨清監督
某請歸河稅於關以增額公言茲擾非便罷不行四十二年調天津驛
鹽河道一載調淮徐河道公爲政務持大體不尙苛細所至除害本民
被其施四十六年遷河南按察使南陽白蓮教事露株連甚夥公曰愚
民妄求福非欲爲亂誅其魁一人餘不問老瓜賊殺人充豫閒勞面禡
衣莫可究詰公廉其巢穴悉禽薙之道路以甯四十七年遷藩山東未
兩月擢巡撫首請緩二十三州縣衛麥苗被傷之逋增營馬買補直視
驛給夏秋豆草銀視撫河鎮標以恤弁兵臨清關請濟甯等五州縣添
立口岸可益課萬兩公疏言關有定所舟楫無壅課自不虧今一旦添
口增稅恐商民裹足無益有損長蘆御史請增鹽引公謂增引易增課
難今引鹽多滯若又增之鹽價必至踊貴是上下病也皆寢不行又因
萬壽恩詔請概免河灘藕灣泉灘學田義田租一年在官八載穀以時
熟

仁皇帝褒賚有加五十五年晉雲貴總督

召對賜克食條十事上之既至鑿險灘闢溪路以緩水激驛勒石非符
下毋濫應夫馬鎮遠施秉被水不待入告委官馳賑之除去鹽井稅計
口派煙戶令正課外給本分煎就地銷補前課之乏石羊緒廠礦老額
不足公請嗣後硎口旺開衰止歲豐採款停課多少無制定額董事者
獲蘇是時滇承平久林蠻洞蠻潛萌異心土日常應運竊武定鳳氏孀
女而據其地其屬不平內附應運遠稱兵入境公怒曰小醜敢爾會師
勦捕檄其鄰那德洪等夾攻之應運遁黔黔中斬其首以來執鳳氏遺
孽歸之京師分兵守其地撤甸平五十八年撥浙中滿兵來滇公豫辦
宿食所過安堵會西陲用師餉取足滇黔黔督年羹堯請滇餉至黔同
解公言迂道非便

仁皇帝知公年雖老可任大事命親往西藏犒軍公卽日戎服治行未
至藏百里遘疾語從者曰我死分也恨未達

君命耳距所生順治十年十月三十日春秋七十公侍母孫太夫人疾
以孝稱人覘公顏色卜太夫人疾益損輒中居喪哀毀忌日蔬食終身
俸入推子三黨日廩月餼以迄婚喪恩意備至光祿公嘗銘其斛曰出
此人此厥惟公平有易是者天殛其人公謹守家法凡遇遷除輒蠲佃

租尤不敢以貴富加鄉里喪歸之日老幼流涕配趙氏王父士春宮保
文毅公孫登崇禎丁丑第官至左中允父瑞南順治丁酉副榜事祖姑
及姑無違禮撫兄子如子割宅分產與之性慈好施病給藥寒給衣以
佐成公德封一品夫人後公一年卒年七十有一合葬公兆子男五人
漣河澍浩瀄漣己丑進士右春坊右庶子洞乙酉舉人山西布政使澍
長蘆鹽運使先公葬卒趙夫人出涪兵部武庫司郎中側室陳氏出涪
恩廕生側室蘭氏出女二長適刑部郎中錢大鼎次適成都知府王瞻
趙出恩撫女二一適中書舍人宮雝一適嚴州府同知曹儀孫男十八
楠楷柞榆柗榕欄榛檉楷欄雍正丙午舉人楠庚戌進士工部額外
主事孫女十三人曾孫男十三人曾孫女八人公子姓賢而有文能紹
家學
今上元年山東巡撫某歸通省捐穀羨餘於公家追償會公弟相國公
方爲少司農具奏原委
上更命後巡撫核減之雍正八年復奉
旨蔣陳錫子河任涼莊道及山西臬藩實心供職可蠲免其家應償捐
穀之半公前事始得邀

恩大白漣等具以禮葬嗚呼公可謂有子也已銘曰
蔣自姬分九侯漢臣海虞奮晉派衍城南公由令興繩厥祖武家漿戶
糜曰公活我天鑿精誠爲降霖雨民受其膏公曰竊取公來自東時和
歲豐一莖五穗嘉禾芄芃公曰匪子

聖德之徵

帝用汝嘉宸章親灑何以予之弓矢鞍馬又何予之冠纓鞞袴維此東
方聖人之鄉政平民富弦誦洋洋擴是賢書增我國光

帝曰南疆老臣是倚公壯厥猶強誅弱豸往哉西陲勞我軍士西師孔
亟公行不遲據鞍鬢鑠陟彼崔嵬玉門不返馬革全歸人孰無終公終
王事爰有孝子克家繼志公多陰德施於來嗣伐石銘詩百世勿墜

趙公宏變墓誌銘

任士鉉

直隸總督趙公以疾薨於位
天子震悼特遣皇孫臨奠并賜御製輓詩一章予祭葬諡肅敏哀榮並
至公爲勇略將軍襄忠公次子惟
天子永念舊勞以公能世篤忠貞服勞王家所以待公者至重至久在
直隸十有七年寵遇尤渥至於公薨

天子念誰可使者乃命其兄恪敏公之子署光祿卿之垣往署巡撫事特加僉都御史以重其任前此未有也公諱宏燮字亮工號理菴系出山左先世以軍功隸陝西綏德衛後以襄忠公初任甯夏水利都司遂占籍甯夏當吳逆之變諸將與襄忠齟齬不合襄忠提孤軍入陽平關取全蜀復獨當一面入滇除其孽其功在史冊至今赫赫照人耳目世言將略者推襄忠惟公能成其業與其兄恪敏公秉旄對仗垂功名於不朽公自直隸由完縣令起家遷南路同知特陞天津道丁襄忠公艱服未闋特授直隸巡道三年復補天津道明年陞山東按察司使又明年卽其地陞布政司逾年

特命河南巡撫又一年特調直隸巡撫在位十年

天子以公習知畿輔民風土俗吏民相與安之不可易以人特加總督仍管巡撫事俾久其職直隸之改總督自公始其治吏也去其太甚者而不毛舉細故其治民也務期休息而不以多事擾民其興學校也請廣州縣進學額又立義學以課生徒保定左衛有學無廟公捐資建之上嘗巡行近甸見畿內之民日有起色弦誦之聲不絕特製詩章親灑宸翰以獎勵之既而遂有總督之命襄忠公嘗鎮天津公又兩任天津

道以先公舊棠思人勿拜有河東地距天津僅一武而去武清百餘里徭賦病其遠涉公請以地歸衛民便焉衛有西沽渡爲九河下流當伏秋水漲諸河之水匯集於此奔湍激濤行人病涉公創立浮橋商旅往來如織未嘗濡裳至今豐碑轟然也天津關稅舊設監督後特命公兼理行旅載頌其在完縣也鄰邑飛蝗蔽天公具衣冠禱於神於是有蝗不入境之異其在天津也火延燒居民屋廬公復肅衣冠拜之於是有返風滅火之異公自縣令及捕盜皆不畏強禦及任巡撫莊頭有李必達者欲圈旗退納糧地六百餘頃民幾失業公爲民請命

特旨免其圈占民歌樂土其在中州巡撫雖未久而條奏地方利弊靡不措置得宜請去病民者數十條而免辦官柳者爲尤著中州密邇黃河築堤需柳作埽民間辦運數倍其值公請官爲代運民困立甦公久勞於外勤恤民隱遂以成疾

上既特加總督以慰其心復遣御醫診視親督醫院製藥公感激

聖恩疾日益差而天子溫綸寵錫所以優待者視前有加嘗迎駕趙北口上欲周悉民情特命中使刺船召公傍御舟以對在熱河

命內侍駕小舟召見復令近侍扶掖遍遊避暑山莊三十六景前此迎駕白河忽躍白兔

上引弓射之應弦而獲遂以賜公皆曠世之奇榮也其他

恩賜上方珍物不可枚舉其巡撫

賜翎亦自公始公自幼育於外曾大父母每思所以報其勤劬康熙四

十七年恭遇覃恩請以已官階馳贈外孫為外祖父母請封亘古所無

上特允俞遂為著令公於地方水旱疾疫尤所關心請蠲請賑靡不舉

行惟公之明德

天子之求舊所為君臣一德交孚其契於斯極矣公生於順治十三年

三月二十日寅時卒於今年六月十八日申時春秋六十有七配吳氏

誥贈一品夫人繼康氏有子曰之璧次靡氏有女二人次賈氏撫一子

曰之增長女適戶部郎中張公子候補知府渠次適刑部尚書張公子

右春坊右中允縉之璧幼未聘之增聘甯夏總鎮葉公女公自少為文

操筆立就及居顯位手不廢書知公固能文武以世其家者也其子之

璧將以某年某月某日葬公於某所來請銘詞曰

公秉旄節畿輔旁身依日月照為光股肱心膂

帝命將曰余一臣守封疆燕南趙北汝障防謹守管鑰弗敢忘吏民恬

熙皆樂康惟

帝之德臣何長鞠躬盡力勸贊襄夔龍衛霍世不常惟公父子遙相望

詒謀燕翼厥後昌高牙獵獵旗風揚行人過者攀遺棠載道丹旄返故

鄉涕洟從之餽壺漿琢石紀幽銘其芳維

帝之褒終允臧康熙六十一年歲次壬寅九月某日吉旦

貴州巡撫右副都御史劉公蔭樞墓誌銘

陸奎勳

巡撫劉公蔭樞字相斗別字喬南世居韓城潭馬村康熙己酉舉於鄉

丙辰成進士知河南蘭陽縣事入為吏科給事中內艱服闋補刑科轉

戶科前後章疏數十上如論連捐速陞之弊及捐員宜試保舉宜停又

請開言路覈名實又言藩臬宜入覲奏事又論秦豫兩省事宜及楚省

均糧悉

報可出為江西贛南道除私收門稅又米市有牙帖銀協濟定南相斗

計歲入置田以租充之牙稅永除署臬篆忤巡撫意因事劾罷之遂遊

匡廬而歸會秦中歲飢盜起里黨多不給相斗為貨粟賑荒築堡以守

大河自韓城東北南出龍門山中兩岸絕壁鉤挽莫施相斗治鐵為柱

索舟緣之以進又築濠水石橋修柿谷陂及城中通衢鄉里賴之癸未

鑾輅西巡至潼關相斗民服踴迎道左

上顧問曰是劉髯也何為民服相斗具對所以復原官未幾起為雲南

按察使部推廣東布政使督撫交章留即為雲南布政使滇海源廣流

狹形似臥甌秋水泛溢時漂沒田廬相斗疏濬海口以暢其流又修築

六河岸牖四十七年擢貴州巡撫五十年奏廣貴州鄉試中額黔中山

田耕一年率不可再民懼征賦及之莫敢田者相斗榜示闔屬聽民墾

荒永不起科又自雲南坡至蕉溪鑿馬路二千餘里以便行旅五十四

年四川烏蒙土府祿鼎乾與貴州威甯屬土目祿世華因爭稻田壩劫

虜世華人畜去川撫年羹堯委員往勘鼎乾負固不出年羹堯欲勦之

相斗持不可事聞乃遣都統阿爾納副都統吳坤侍郎噶敏圖會同雲

貴川三省督撫於畢節縣勘審苗民多驚走相斗肩輿從數卒傳諭曰

若輩各安堵無恐既至畢節念邑小不足駐諸大帥乃獨棲荒寺中諸

公聞之咸約束部下毋擾民鼎乾仍重閉不肯出相斗使千總一人持

檄走諭之曰若出訴即生抗命即死老夫不食言土酋相顧曰老劉公

恩信素著敢不出乎於是出就質成土酋土舍俱泥首謝罪歸所掠人

畜及侵地結好而去會澤旺阿拉蒲坦擾哈密

上大出兵討之相斗密疏諫沮復奏陳六事奉

旨馳驛赴軍前盡心周閱崎嶇三月至巴爾坤復上疏數千言備述形

勢時相斗年已八十因以老病乞骸骨仍回黔任已休致入京部議以

阻撓軍務例發傳爾丹種地在屯三年

召還留京六十一年首春與燕饗國老之禮坐次最先雍正元年

召見養心殿賜朝珠並白金四百兩旋請歸是秋卒著有春秋蓄疑四

卷易解二卷一作周梧垣奏議宜夏軒雜著

又秉燭子傳趙元祚

秉燭子者劉公耄年好學自勵之稱也公諱蔭樞字喬南秦之韓城人

少以豪傑自命讀書恥事章句舉康熙丙辰進士初授蘭陽令邑濱河

舊設巡河夫重為民困公至減之造士安民凡當興革者力請諸大吏

至侃侃爭於前雖封駁數次終不易始或以為強項後乃益重公邑大

治盜聞風不敢犯其境以最擢刑科給事中丰采著朝端旋丁內艱去

服闋補原官前後章數十上皆關大計詳見梧垣奏疏中至疏豫秦兩

事

上覽奏大悅翼日召至乾清門復令條晰其事一一奏對不失一言每
會議事有不可者輒抗聲執論如議楚省攤糧事公恐遺千百人子孫
累委婉開陳九卿乃奏免楚人至今德之有某以例驟至方伯有欲保
之者以公故不敢發言惟目視公公默然遂無敢言保者由是直聲振
於朝未幾外轉贛南道開示屬吏以愛民為忠諸屬知公在朝風裁奉
法惟謹贛俗健訟公下車無慮千百紙日夜為平決訖曲直不少差
久之訟寢少數微出察民間疾苦贛有城門稅久為民害蓋鎮將沿之
以營利也公陰遣一人攜布南門出東門入復遣一人挑麥西門出南
門入囑曰門欲稅以布麥為質已而門者果皆止之取其應得稅錢公
乃設席邀鎮將者過飲守令皆在前二人者席之前跪曰奉市布麥門
者欲稅無錢今尚質在門公勃然作色曰若何言曰門稅公曰門稅為
暴監司買物尚如此如小民何吾不能為民全鎮帥面也拂衣起守令
不知所為鎮帥慚退翼日即下令革去公乃具觴迓之至署登堂未定
先疾趨下拜曰帥能如此小民福也敢不拜又有米行者額課若干牙
人緣之為奸凡民載米至河邊取其錢勿得私糶者牙課一而取者不
止十倍民苦之公故問其日徵若干牙故減報其數公分遣人卒至盡

取諸牙者記簿來會其數則大駭於是責其欺狀另委收之收不數日
得銀若干為易田約其租值可以抵額課遂勒石黜之聽糶米者自便
撫軍以為廉明使署臬篆南昌故多訟師與少年遊棍公至則皆遁去
地方肅清方思大有所建白未數月會有疑獄督撫各持一見公弗能
兩全遂以彈章罷去或謂公剛直為人所譖公寓匡廬事結蕭然以歸
怡如也韓城南有河為縣治要會自古無橋每雨漲病涉人畜多溺死
公為諸生日慨然有建橋意然水急厓闊人多迂之至是遂銳意倡建
家居三載經營是事暇即課里中子弟以自適癸未歲

鑾輿西巡公以民服至潼關迎駕
上熟視之指曰此劉鬍子胡不官服以削職對公美鬚髯偉軀幹直聲
震垣中人莫不知有劉鬍子
上數召對稱旨故常記憶頃即召見賜還原品駕回復召至行宮霽顏
垂問奏對良久

上命中侍掖之起出即傳旨起用滇廉訪使公至滇數微行採滇利病
先是各屬坐省者多豪橫與游棍為非公重懲之嚴飭各屬遠近聞風
無不帖然於是訟寃抑者悉平決如流有造蜚語謀反者公執其渠首

數人論如法餘不株連旋升粵藩督撫特疏留滇昆明故有書院迤東
西士子肄業其中公暇卽進士而課之親爲訓誨貢院號舍秋隘科舉
士數浮於舍公捐金買地增修號舍另闢規模內外改觀並除科場行
戶諸累昆明湖源廣流狹口如臥瓶秋水漲溢致田舍多傷公單騎走
湖口審視商之兩天府力爲挑濬並修築六河岸閘戊子五月不雨公
引咎禱於五華山叩頭至地有聲已而大雨省會十萬戶米價昂力請
發粟分四城平糶陰囑司筭者貧民苟升合無錢悉與之勿較多寡如
是者三月所全活不少他日公出婦孺視而祝曰願翁世世爲卿相驛
站兵餉悉實其數無絲毫漏卮在滇五年上下賴之以安擢貴撫去之
日扳轅臥轍多感泣下者乃塑其像於近華浦黔巖疆山多田少苗狎
雜處滇蜀楚粵交錯其閒四民多客籍前朝安播之亂國初水西之擾
號稱難治公治黔調和文武撫綏漢苗輕徭薄賦絕餽送以安靜爲務
三江及苗狎仇殺諸案有未結者首清之釋無辜數十人戒有司無生
事啟隙課士勸農訓兵化苗通工惠商黔道高山峻嶺人馬艱行公開
修馬路自雲南坡至蕉溪二千餘里黔故多陰雨自是時和年豐迄公
之任皆大熟凡所條奏皆關大計蜀遵義民苦加派聞公直匍匐來言

狀哀祈題達公密疏以聞

上遣使會川撫勘其事削郡以下數十人蜀困盡蘇草奏日或曰公不
避嫌怨乎公曰有分土無分民孰非朝廷赤子知而不言是欺以事君
也何避嫌爲又以黔省錢糧課稅僅十餘萬每歲協餉二十餘萬稍愆
期兵士懸領以待於籌餉疏內請另發銀二十萬存貯藩庫爲未雨綢
繆之計疏凡三上俱格於部議撫黔既五年疏請陛見以老乞歸
上溫旨慰留癸巳覃恩晉階榮祿大夫祖父母同蔭一子明年復拜疏
告老疏已發軍民罷市道遮驛使不得去會烏蒙土酋與威靈土舍隙
殺川撫委道員至烏蒙問故土酋匿不出遂題請以兵臨之
欽差會滇蜀黔督撫提臣至畢節勘其事苗民驚駭不知所爲多避去
公肩輿就道沿路諭無恐苗眾見公幡幡然簡從來咸喜相率出迎爭
以物來市公先至畢節吏爲設館公曰畢小邑諸大人皆欲飾館將何
以應乃就荒寺中恐諸執事者蹂躪與之約曰邑小供薄勿怪若所令
不嚴老漢非畏人者眾皆肅然公曰此一小吏可了公等勿慮於是發
標下千戎一人走土酋所招之來先是威甯土舍已出而烏蒙土酋恃
險且聞諸大帥咸集愈驚疑誓不出千戎至傳公諭曰若出我活汝若

抗命卽滅汝老漢言無多且重失信土酋某曰老劉公恩威素著以誠
信待人雖死敢不出遂與俱來公方與客圍碁報至卽會諸大人共訊
二酋咸服罪願釋仇永不構隙叩頭去謂人曰我今方得見老劉公眞
盛德人也遂具奏聞各大人聞公簡從來咸撤其從人大半於它所以
故畢節勿擾公復肩輿歸老幼道傍日不絕爭來觀其丰采所至慰勞
使安業明年乙未澤亡阿刺蒲坦擾哈密大兵出大漠討之兵旣行捐
餉馬者各省皆起公得抄報密疏曰澤亡阿刺蒲坦小醜也侵擾哈密
小警也語多切直而公以黔疆瘠薄復不能助餉又自念受知
主上起自田閒恩獨深重明年且八十無以報於是具疏告老復密條
奏六事畧曰臣老人也報
皇上之日無幾敢冒死以言從來與庸主言非發露其詳不可與聖主
言則引其端而已悟

皇上聖主也臣愚不敢多言敢以六事進重內地弗勤遠畧謹喜怒而
慎用人核名實以重國本草旣就客曰願公少緩密奏而拜告老疏公
忠形於色曰老臣且告退矣它日死不能言於是朝拜密摺隨拜告老
疏告老疏發復爲官民遮留不得去遠近苗民皆趨省環轅跪泣曰公
無去公在此無敢啟隙者地方得甯卽不得已願公少留須與明年上
告不得命眾不敢起公不得已揮泣勉諾而密疏已行
上覽奏曰劉蔭樞年雖老尙能騎馬著乘驛赴大軍駐劄所在盡心周
閱矢公詳議具奏公得報卽日就道抵巴爾坤行視軍營上書侃侃洋
洋其意在屯哈密以東兵不輕出逸以待勞凡數千言旋以疾請歸骸
骨有

旨切責令親看雪回奏公於是上疏引罪謝再乞骸骨

上覽奏云劉蔭樞在貴州官民俱說他好情詞堪憫姑從寬免議著仍
往貴州辦事公復上疏以病乞歸有

旨著速赴任公不敢辭沿路醫治再赴黔任去黔日黔人建龍門書院
於南明河上塑像其中至是聞公再至雖童孺亦拍掌歡舞以爲得我
老劉公也視事甫半載有

旨休致來京公卽拜疏行黔人如失所怙已而下刑部部議以阻撓軍
務擬絞援師懿德例發西邊屯田俟大軍凱旋另行治罪有

旨著發往傅爾丹處種地時公年已八十一矣自黔進京日其子以公
年老涕泣請侍公笑止之曰人死道路與家庭無異汝自歸耕田讀書

吾之身

君身也勿我慮公鬚髮久白自塞外回忽有變黑者齒落者復生二童牙監臨擬程文十作一日夜而成筆示諸生稿不加點日書忠孝仁恕等大字闊四五尺許道勁過於少年所為著有春秋蓄疑四卷易經解二卷宜夏軒雜著二卷制義文錄一卷皆見道之言德州孫勳板以行世其雜劇數本則又諛諧多風為人豁達剛方而不苛細人有過面叱之即過而不留與人言多規勸引掖後進不倦學者稱龍門先生晚年自號秉燭子蓋取古人為學少如朝行壯如晝行老如夜行其進德不敢少懈如此在喀爾喀四年復取進京還其職

聖祖召見老臣年七十以上者賜之食賜公首座諭曰劉蔭樞批鱗直諫忠臣也但書生不知兵耳仍留之京

今上登基召之見曰卿先帝老臣朕欲用汝以年太老召其子熾進扶之出賞賜御硯朝珠白金若干令其還鄉鄉人榮之卒于家年八十七歲

兵部尚書總督浙閩覺羅公滿保墓表

蔡新

烏序是惟覺羅鳧山公靈魄之藏公諱滿保滿州正黃旗人系出天潢

自高曾以上代著旂常考少詹事諱僧參頁時望公其季子也年二十二登康熙甲戌進士改庶吉士丁丑授檢討戊寅春以詞臣副刑部尚書傅公左都御史張公赴陝西清理糧冊蓋異數也遷侍講兩典試事擢授國子監祭酒奉

命冊封朝鮮嗣王祭告禹陵陞內閣學士兼禮部侍郎加經筵講官時聖祖仁皇帝御極五十餘年寰宇奠安愷澤翔洽獨東南瀕海之區久為奸宄逋藪舊染宜新而民困甫甦凡所以調護扶植之者尤亟公以懿親侍從疊被殊恩入襄機務

天子知公才可大用遂被以福建巡撫之任下車浹日首効閩帥之縱盜市功與夫劇盜之恃撫暴橫凌虐鄉里者遂悉擒羣盜殲其魁勦滅黨羽閭閻樂生農耕於野士興於學蒸蒸乎易俗移風矣迺請遴才能以居劇地百廢俱修輯甯五載

天子益信公果可大用特命總督浙閩兩省公職重身勞幾叢慮密不憚暑烈躬按七郡之災全活億萬親度環海要地自浙江乍浦至閩粵南澳之交上下五千餘里建墩臺水寨一百二十七所安礮位一千一百七十有八海洋至今賴之所至鴻施茂績若廣儲蓄均糧餉釐漕弊

勘關征各有條法大率兩省民生之厚兵防之周庶務之詳實自公籌
之始究也臺灣新隸版圖孤懸海外其處者龐且梗公按圖考跡增北
路淡水一營以扼其後時亂猶未萌也辛丑五月奸民朱一貴倡亂戕
殺鎮將焚府治全臺盡陷警報一日夜至省會公聲色不動密召同城
文武計議以次日具海舟聲言運米下遊次日大閱兵老弱盡令入城
丁壯登舟刻期順流南下於是眾始知有臺變公乃由陸路大張榜示
凡有技勇超羣剽悍不羈之徒咸許投軍門充伍雖舊日過惡悉與湔
滌於是漳泉郡不逞之徒思乘閒竊發者咸歸幕府內地始安公親駐
廈門所檄召之兵先期雲集米積如山以六月十二日命將出師密授
機宜盡銳攻鹿耳門水高數尺揚帆直進十六日克安平鎮轉戰七鯤
身皆大捷二十三日遂定府治賊惶駭奔竄北路而淡水一營阨險以
待與官軍夾擊賊進退狼狽束手受縛凶渠獻俘七日而臺地悉平公
之方略素定迅奏膚功如此捷聞
天子下詔褒美而公惟以不能消弭未然自引咎
世宗憲皇帝紹登大寶錄功加兵部尚書賜一品封贈仍畀以巖疆之
寄公次第經理浙東西而水利潮防運道齟行及海塘柴石諸切務無

不盡心焉民不擾而事畢集至于今皆尸祝之惟公實被

兩朝之寵眷受任總制一方用能奉宣威德使反側畢安瘡痍獲起利
賴施及無窮歷四十年竟以勤事卒於官烏虜公文武壯猷與方召比
烈其不朽也夫有子十二人博良阿那哈吉福吉祿滿吉蘇金山吉禧
金梁衡山嵩山承福吉善成稟公遺訓吉善今為祭酒樹學懋勳思纂
就前緒以新共事成均久且聞人知公熟也因請表其隧道之碑系以
銘曰

錫維城藩屏協劬厥躬東南攝勒鼎鐘光玉牒

資政大夫前巡撫雲南都察院右副都御史正黃旗漢軍都統綏遠城
左翼副都統甘公國璧墓誌銘 彭啟豐

前巡撫雲南都察院右副都御史甘公以乾隆十二年七月戊申卒於
揚州其孤士琪等來徵銘按狀公諱國璧字東屏號立軒姓甘氏始祖
正宋開寶閒爵三等伯食邑江西豐城遂家焉至受和隨明成祖征遼
東世授瀋陽中衛指揮復著籍瀋陽數傳至公王父應魁從
世祖章皇帝入關仕至石匣副將因為漢軍正藍旗人父文焜由兵部
筆帖式歷官至雲貴總督康熙十二年吳三桂反兵不支援絕文焜死

之加贈兵部尚書諡忠果事具八旗通志公忠果第六子以難蔭肄業太學期滿

御試擢高等授河南陝州知州陝自經寇亂殘敝甚公撫綏土著招集流亡頓有起色州有泉曰珍珠泉牧賢則流涸久矣一旦騰沸遠近傳異之巡撫顧公薦于朝除蘇州同知時大吏以賦役不均題請丈量以委公公遂創清田議十九條行之

聖祖南巡公入覲屢蒙溫語賜勁節字額命懸忠果祠是冬擢山西平陽府旋調浙江甯波府首除六縣重耗禁海關水稅時趙公申喬張公泰交相繼撫浙皆重公是時

聖祖復南巡駐蹕揚州顧問浙江循吏趙首以公對既幸杭州公迎謁賜御書朱子詩復書永貞字額諭云汝父盡節朕未嘗忘此為汝母書也明年特陞甘山道丁太夫人憂服闋補山東登萊道削浮苛布寬簡

清理庶獄境內肅然三年儀吉案言在官三年也甘公以康熙四十九年擢江蘇按察使又擢山東布政使其明年擢雲南巡撫

使五十三年遷擢江蘇按察使又擢山東布政使其明年擢雲南巡撫時旱疫斗米二千錢公虔禱時雨立沛獲有秋先是土司每因小忿相

讎殺公飭府縣官調劑撫馭苗獠以安儀吉案五十七年十二月疏言同知駐劄甸分防治理部議如所請久之撫遠大將軍會陝兵取藏公籌畫輓運之宜水

陸道途出入便否民得不病而領兵都統違節制運不時達坐是與總督蔣公陳錫同罷官復奉命往軍前効用

世宗憲皇帝元年命撤兵乃得由西甯入口時羅卜藏丹津騷動西甯路絕從者泣相視無人色議取道四川公曰死生命也誰敢違

旨自藏至西甯無人烟其山盡童若髮拾獸骨馬糞給炊爨遇雨雪輒斷火食公安之已而達雲南補軍伍行又八年

召還朝授副都統旋擢正黃旗漢軍都統監造火藥辦理八旗井田今皇帝御極之二年補授綏遠城左翼副都統儀吉案本傳三年七月

領兵駐防供職四年坐同官事落職儀吉案同官為公為人慷慨有大節好讀書晚而嗜易公餘焚香默玩未嘗釋卷偶見古人云水止乃澄


鏡明斯應遂知用力久而有省判決如流未嘗有誤所著農圃要覽實政條要諸書行於世公生於康熙八年卒于乾隆十二年得年七十

有九妻王氏封夫人以某年月日合葬於某阡子男子二人士琪陝西延安府同知士瑞淮南儀所同知女子六人孫二人孫女五人銘曰

延安府同知士瑞淮南儀所同知女子六人孫二人孫女五人銘曰

卓哉甘公夷險一節驥足方展不受縉紕有鳥高飛萬里一瞥西鄙陸
梁總戎搗穴裨將踟躕中軍賜玦崎嶇輓運水草盡絕雪山峩峩胡馬
悲噎經公往返大軍亦撤
皇仁浩淼臣罪前雪績著
三朝年享耄耄天生偉人不蹈常轍銘諸幽宮千秋永揭

碑傳集卷六十八



貴筑黃彭年編訂



70043365

